



historia 3130.

500.

XI V 107.

VI.

34 a. b.

CONSTITVTIONES
GENERALIS CAPITVLI
MIECHOVIENSIS:

Die XIX. Mensis Octobris, Anno Do-
mini 1621. celebrati.

Auctoritate eiusdem Capituli promulgata.

Et cum Facultate Illustrissimi & Reuerendiss.

Dñi, D. loci ordinarij sub Prælum traditæ.



C R A C O V I A E,

In Officina Typograph. Matthiae Andreouiensis,

APPROBATIO.

IOANNES FOXIVS I. V. Doctor, Ecclesiae Cathedralis Cracouiensis Archidiaconus, vnus ex Censoribus librorum imprimendorum, ab Illustrissimo & Reuerendiss. Dño loci Ordinario deputatus, hasce Constitutiones Religioni Ordinis, Custodum Sepulchri Domini seruientes, legi, easque optimo zelo Superiorum conscriptas, ac Religiosis ad perfectam institutorum suorum obseruationem facem praefertentes, vtiliter imprimi posse censeo.

Cracouiae die 13. Martij. Anno 1621.



18989, I

In Stemma Reuerendissimi Domini,
D. MATTHIÆ LVBIENSKI, Ord: Canonico-
rum SS. Sepulchri Domini Hierosolymitani, Præ-
positi Generalis, designati Episcopi Chelmensis.



Quam stupeo caput hoc traiectum? Num quia frontem
Fert: veneranda bonis quæ metuenda malis?
Non sat est, ultra virtutum præmia dictat
Aequæ LVBINIO, præ pietate, dari
CHELM Arocat, prope. Meus es. MIECHOVLÆ contra
Nec volo, nec possum mittere te. Meus es.
O sublime iubar, litem tolle, accipe CHELMAM
Però MIECHOVLÆ sis memor vsque tuæ.

M. Simonis Driouij Zarcensis, Collegæ Min.
& in Alma Acad. Ciac. Professoris.

MATTHIAS LVBIENSKI CANO-
NICORVM REGVLARIVM, CVSTODVM
SS. SEPVLCHRI DOMINI HIEROSOLYMI-
TANI PRÆPOSITVS GENERALIS, NOMI-
NATVS EPISC: CHELMENSIS. &c.

Vniuersis Religiosis nostris Fratribus
Salutem in Domino.



*O*ST' Eaquam Diuina vocatione &
vestra concordie voluntate, ad sustinen-
dum munus Generalis Præpositi, Ordi-
nis Canoniorum Diui Augustini, Cu-
stodum Sepulchri Domini, admoti su-
mus; continuo sentientes, quàm graue
onus humeris nostris impositum suscepimus, eò curam,
studiumq; nostrum contulimus, vt præscriptam à maiori-
bus nostris religiosæ vitæ normam inspiceremus, vni-
uersique Ordinis nostri religiosos, & loca Ecclesiæ quæ
eorum curæ commissas, instituta & penacta generali visita-
tione, lustraremus, vt & nos eorum vultus, actusque, &
conuersationem notam haberemus, & illi vicissim Pa-
storis voce, & cohortatione audita, ad suam sibiq; subie-
cti populi curandam salutem, animarentur. Quibus ex
animi

P R A E F A T I O.

*animi nostri sententia, Diuina nobis suffragante gra-
 tia peractis, reliquum erat, vt coacta vniuersi Ordinis
 nostri Hierosolymitani congregatione, consilium cape-
 remus, qua ratione, quod per Prophetam Ezechielem
 nos Dominus facere iubet, id quod in grege nostro in-
 firmum erat, consolidaremus, quod aegrotum sanaremus,
 quod confractum alligaremus, quod abiectum reducere-
 mus, & quod perierat, quaereremus: leges & constitu-
 tiones maiorum nostrorum, magna ex parte abusu &
 desuetudine abrogatas, firmaremus, alias quas prae-
 sentium status poscebat, conderemus. Quod quidem aliis
 negotiis, & curis utcunq; soluti, hisce diebus praestitimus:
 conuocata & peracta Synodo nostri Ordinis, in qua mo-
 re institutoq; maiorum nostrorum, ex consilio & assensu
 omnium Fratrum, Constitutiones Ordini & instituto
 nostro, in quo nos Domino famulaturos, iurata fide spo-
 pondimus, consentaneas, sanximus & didimusque: quas
 religiosorum & doctorum hominum censui examina-
 tas & approbatas, vestrae imprimis utilitati, vestrae sa-
 luti deservituras, in lucem damus. Hortamur igitur
 vos in Domino, & per viscera misericordiae Dei obsecra-
 mus, vt non ad legendas modo has Constitutiones, sed
 multo magis ad implenda & exequenda ea, quae illis sa-
 lubriter praescripta vobis proponuntur, animum adijci-
 atis. Vestri hic agitur salus, vobis & gregi curae vestrae
 commissio,*

PRÆFATIO.

commisso, omnis hac in parte nostra desudauit sollicitudo, quam vos gratis animis excepturos, & paternam nostrum cunum filiali obseruantia amplexuros, omnino cōfidimus. Deus Optimus Maximus eas vobis inspiret cogitationes, ad eos accingat conatus, qui vestrae vocationi sunt consentanei, vt omnes actiones vestrae religiose sanctitatis odore flagrent, vt nos qui id vnum intendimus, quatenus nostrum & vestrum salutem promoueamus, vt hoc qualicumq; labore, quem simplici animo, augendi cultus diuini causa suscipimus, diurnum denarium, apud benignum & liberalem patrem familias promereamur, voti & desiderij nostri compotes efficiamur: Vt in extremo iudicij die, flore virtutum vestrorum ornati (corona enim nostra estis vos) coram supremo iudice compareamus.



AD LAUDEM & GLORIAM DEI OMNI-
POTENTIS, ac vniuersi Ordinis Canonici,
Custodiæ Sacrosancti Sepulchri Domini-
ci Hierosolymitani deputati, commodum,
& vtilitatem, Capitulū Generale, per Re-
uerendissimum D. MATTHIAM LVBIEWSKI,
eiusdem Ordinis & Conuentus MIECHO-
VIENSIS Præpositum Generalem, &c. ad
diem xix. Octobris, Anni M.DC. XX. Mie-
chouiam indictum, eodem die votiuo sa-
cro de SPIRITU S. præmisso, ac deinde se-
quentibus diebus fæliciter continuatum.
Præsidente eodem REVERENDISSIMO GE-
NERALI PRÆPOSITO. Præsentibus Reuerē-
dis ac Religiosis Præpositis, Parochis, &
alijs Regularibus eiusdem Ordinis Cano-
nicis. Cuius quidem Capituli hæc sunt
Statuta & Decreta, quæ sequuntur.



PROEMIVM.

Cum in aliquot Capitulis Generalibus, opera & studio Illustrissimi olim Cardinalis Barthelemi, Praepositi Generalis Meechouiensis, celebratis; illa omnia, quae ad vitam Religiosè instituendam, & ad alia munia huic Religioni annexa, ritè obeunda, pertinent, ita sufficienter sancita, & Typis mandata reperiantur, ut ferè nil præterea requiri videatur, quàm ut ea debitæ executioni (sine qua frustra conduntur leges) demandentur; hoc autem nulla alia commodiori ratione, quam per illos, qui in Officiis ex antiqua religionis nostræ ordinatione sunt constituti, perfici posse videatur. Ideò eam methodum, in sanciendo huius Capituli Statutis, & ordinationibus, seruandam esse censemus, ut cuiuslibet Officialis munia, iuxta præscriptum Constitutionis ultimæ Cap: Gen: secundi, distinctis Capitibus comprehensa, describantur; quatenus unusquisque illorum functionem suam, quasi in vna quadam tabula depictam aspiciat, eiq; deinceps tantò diligentius attendat.

DE OFFI-



DE OFFICIO PRÆPOSITI GENERALIS.



Vandoquidē Pastoris officium est præcedere, ouium autem sequi, ideò operæ precium fuerit, vt Præpositus Generalis à seipso reformationem incipiat, & memor Religiosæ vocationis suæ, vitam suam ex præscripto Regulæ, & Constitutionum Ordinis, ita instituat; vt reliquis membris sit ad omnem virtutem, & perfectionem exemplo, & incitamento. Circa Ecclesiam suam resideat, & ab ea (causa legitima excepta) se non absintet, præsertim verò pro solemnioribus Festis diebus Anni. Communi vitæ cum fratribus assuescat, & cum illis in Choro, Capitulo, Refectorio, & Dormitorio, (quantum per alias occupationes licebit) sit frequens, eosq; debito honore & amore prosequatur.

Mensa frugali (in absentia præsertim Hospitum) contentus, duos adminus fratres ei adhibeat, & ad eam ex sacra scriptura, & aliis piis Ecclesiæ scriptoribus, aliquid accomodatum legi faciat. Habitum decentem, non tamen superfluum, Cruce geminata, (ex Præscripto Ordinis) insignitum, deferat.

Bonorum, & Patrimonii Monasterii ad mensam Præpositi antiquitus pertinētium meminerit se non Dominum, sed dispensatorem esse, ac proinde redditus illorum, superfluis sumptibus non exhauriat, sed quidquid sustentationi statui ipsius conuenienti superfuerit, id in utilitatem Ecclesiæ suæ, & in vsum pauperum conuertat. Prouentusq; suos ita distribuatur, vt expensarum rationes Capitulo

tulo Generali (si quādo ita expedire videretur) reddere sit paratus.

Hospitalitatem à SS. Patribus magnòperè cōmendatam promptè erga omnes, præsertim verò Peregrinos & Religiosos exerceat, memor eos qui hospitalitatem amant, Christum Dominum in hospitibus excipere.

In suos consanguineos, non sit profusus, & si quando eum illorum inopiæ subuenire, necessitate vrgente, contigerit, id non tã ex affectu sanguinis, quã ex debito charitatis Christianæ officio faciat.

Bona mensæ suæ nullatenus alienet, & ea in Arendam, vt vocant ultra triennium (& hoc cum scitu Fratrum) non locet, nec anticipata reddituum ex bonis locatis perceptione, aut eorundem bonorum ex leui censu ad multos Annos locatione, Monasterio & successoribus præiudicium inferat. Ne autem subditi per locatores, seu Arendatores, opprimantur: & ne bona Monasterii per eorundem desolata reddantur. Neque fines & limites bonorum, negligentia illorum diminuantur: Singulis trienniis duo Consilarii ex Capitulo Generali assignati, omnes Præpositi & Conuentus Possessiones, impensis eiusdem, obibunt, & ne quid eiusmodi in iis fiat, Reuerendissimum diligenter præmonebunt.

Cum autem ex antiquo, certi redditus pro communi mensa Fratrum sint assignati, & successu temporis, per Præpositos Generales aucti, in vsu & possessione eorundem, Cōmunitatem Conuentus sui perpetuò conseruabit. Et præcauebit diligenter, ne per Officialium incuriam, vel malitiam, quicquam ex illis diminuat, vel in aliquos abusus conuertatur.

Fabricam maiorem templi & Conuentus, ex Prouentibus ad Mensam suam spectantibus, pro sua liberalitate prouidebit, & curia Præposituræ vnà cum ædificiis Prædialibus, ne successu temporis detrimentum patiantur, matura eorum restauratione obuiam ibit.

Beneficia

Beneficia ad Conuentum MIECHOVIEN: pertinentia, nemini alteri, præterquam eiusdem Ordinis Presbyteris, Professis, legitimeque iuxta præscriptum Constit: 17. Lib. 3. Cap. Gen: secundi, electis, conferret.

Debitum numerum Religiosorum, ad explendas fundatorum pias intentiones, in Conuentu pro posse foueri curabit.

Maximè autem attendere debet, vt omnes Fratres curæ suæ commissi; vocationi suæ Religiosæ respondeât, vt ea quæ in Regula & Constitutionibus Ordinis præscribuntur, ad amissum obseruent; atq; eius rei causa, ipsum Monasterium sæpius, reliquas autem Ecclesias, eidem annexas, per Prouinciales quidem semel quolibet Anno per se autem, vel si legitime fuerit impeditus, per suos Cômmissarios singulistrienniis, visitet, & quæ deprauata repperit, reformare, & in Spiritu lenitatis, corrigere studeat.

Ac præterea Capitula Generalia, exemplo aliarum Religionum rectè institutarum, singulis trienniis (nisi aliquod legale obstiterit impedimentum) Miechouix habeat, & in iis de disciplina Regulari retinenda, & de moribus deprauatis corrigendis, cum Fratribus Ordinis, maturiori iudicio præditis, consilia conferat.

In omnibus deniq; actionibus, talem se exhibeat, vt quemadmodum dignitate alius præstat, ita illi dem sanctitate & odore, bonorum operum, præcellat.

Porrò cum de dispositione rerum, post obitum Fratrum relictarum, Ordinationes, in præcedentibus Capitulis Generalibus descriptæ habeantur, quæ etiam deinceps obseruari debent: De Præpositis autem Generalibus, & de rebus post decessum illorum relictis, nil sit in iis expressum. Ipsa vero experientia edocti sumus, multos abusus in distractione eiusmodi rerum committi solere: ideo ne id in posterum fiat, obuiare volentes, statuimus & decernimus, idq; sub pena Excommunicationis maioris, per Religi-

osos huius Cōstitutionis violatores, ipso facto incurrenda, vt morte Præpositi Generalis interueniēte, quicquid vltra ordinationem, quæ illi tanquam Prælato, de iure Communi, quo ad pias causas, competit, funere & familia expeditis, & ære alieno, si quod defunctus cōflauit, exoluto, tam ex pecunia, quam ex suppellectili reliquum fuerit, id totum hoc modo distribuatur. Pecunia quidem tam parata, quàm in nominibus existens, & omnis suppellex pretiosior, vt potè argentum, libri, Cassulæ, pluuialia, & reliqua suppellex sacra, tapetia, aulea, vestes, & pelles præstantiores, pretium equorum & curruum, iusta æstimatione venditorum, in vsum ipsius Ecclesiæ. Omnis vero suppellex mensæ, culinæ, cellarii, & vinum, si quod funeri superfuerit, in vsum mensæ communis. Vestes deniq; viliores, statui religioso conuenientes, lectisternia, indusia, & reliqua minuta suppellex, in vsum Fratrum, arbitrio Custodis, & consiliariorum (ante quorum aduentum, res derelictæ, à nemine attrectari debent) diuidenda, cedant. Prædia autè cum frumento, pecore, pecude, & reliqua suppellectili, ita per Administratorem, à capitulo electum, gubernètur, vt meminerit se, futuro successori, rationem administrationis redditurum.

DE OFFICIO.

CVSTODIS ET VICECVSTODIS.

Qui idem & Magister morum.

CVM ex præscripto Capituli Generalis Secundi, Constitutionis 9. lib: 3. Custos totius Regularis disciplinæ director, & tutor esse debeat, ideò hortamur vt iuxta præscriptum eiusdem Constitutionis in exequenda regula, & Statutis Ordinis, sit feruens, & ea

omnia

omnia, quæ ad obseruationem votorum essentialium, & Regulæ disciplinæ pertinent, diligenter à fratribus adimplenda curet, eosq; ad studia sacrarū literarum, & pias meditationes, ac ad perfectionem omnium virtutum, non tantum admonitionibus, sed multò magis, exemplo suo, inuitet.

In Choro dum Officium Diuinum decâtatur, nisi legitimè fuerit impeditus, sit semper præsens, & vt horæ Canonicæ, deuotè, & ordinatè, decantentur, cultusq; Diuinus, nulla in re negligatur, sedulò attendat.

Cum autem Patronorum ordinis officia, nuper in ordinem sint redacta, & cum approbatione & licentia Illustrissimi Domini Lociordinarii, Typis iam mandata; ideò illa ab vniuerso ordine recipienda, & eadem quàm diligentissimè in posterum obseruanda esse, decernimus.

Animarum, quæ huic Ecclesiæ in spiritualibus cōcreditæ sunt, diligentem curam Custos gerat, vtq; iis, per diligentiores, & peritiores Fratres, specialitèr ad hæc deputatos, Sacramenta debitè & ordinatè administrentur, omnem operam nauet.

Nullum autem ex Fratribus, ad audiendas Confessiones deputabit, nisi prius legitimè, ab Officio Illustrissimi Domini Lociordinarii, vel ab aliquo alio, ab eo ad id deputato, fuerit approbatus.

Attendat præterea diligenter Pater Custos, vt omnia recto ordine, iuxta distributionem horarum inferius descriptarum, in Conuentu peragantur, & vt singuli Fratres suo munere ritè fungantur. Nec dissimulet peccata delinquentium, sed mox, vt cæperint pullulare, radicitus ea euelli curet, ipsosque delinquentes, primo quidem admonitione, vel leui carcere (quem ad puniendas leuiores culpas, distinctum, à præsentis subterraneo & obscuro in posterum esse volumus) corripiat. Si autem inobedientes &

incorrigibiles fuerint, feueriori disciplina, & arctioribus, carceribus, coerceat. Quod si eiusmodi correctione se non emendauerint, eos ad præpositum Generalem deferat. Maximè autem in eos, qui dissidia, rixas, contentiones, & seditiones inter fratres excitant, & qui ebrietati student, vel qui septa claustrum sine licentia egredi præsumunt, vel qui denique de turpi vita, & incontinentia suspecti sunt, animaduertat, omnesq; horum peccatorum occasiones diligenter amoueatur.

B Capitula bis in Hebdomada, Feria quarta, & sexta, iuxta Constit. 16. Lib. 3. Cap. Gen. 2. celebrare non prætermittat, eumque ordinem in illis celebrandis teneat, qui ibidem est præscriptus. Præsertim verò sedulus sit in Fratrum negligentis per hebdomadam commissis, diligenter indagandis, & iuxta meritum, & exigentiam corrigendis. In quibus etiam, ad instar aliarum religionum vt singuli, Fratres proprias culpas superiori suo fateantur, Et si id facere neglexerint, ab aliis, qui illorum defectus notauerint, Capitulo deferantur, in posterum obseruari volumus. Clausuræ Monasterii sedulam curam habeat. & vt seræ portarum sint firmæ, & semper clausæ teneantur, attendat, ne uè feminæ septa Monasterii villa ex causa ingrediantur, sedulo præcaueat.

Silentium frequentissimis Antiquorum Patrum admonitionibus cõmendatum, & regulæ, statutorumque nostrorum Decretis cõfirmatum, in Dormitorio, Claustro, Templo, & Refectorio, omni tempore, (horis recreationis, altera post prandium, altera post cœnam, & media post vespas exceptis) diligenter præcustodiat, statimq; silentii, sine legitima causa fracti, transgressori penam arbitrariam iniungat.

Claues cellarum omnium, (præter has quas singuli fratres habent) penes se retineat, licitumq; sit ei aperire cellas, & illas inuisere, quoties ipsi expedire visum fuerit. Ordinariè autem visita-
tionem

tionem cellarum singulis mensibus obeat, ac videat, ne in cellis re-
tineant fratres res statui Religioso minime conuenientes, vtpotè
instrumenta alearū, imagines profanas, scripta lasciuia, vinum, cre-
matū, ceruicalia superflua, vestes exquisitas, & alia similia; & si quæ
talia repererit illa statim amoueat, & excludat. Ea autem, quæ ex
necessariis alicui fratri deesse cognouerit, libenter ex communi
vestiario suppeditet.

Oeconomix domesticæ ita attendat, vt in administratione illi-
us tam per ipsum, quàm per alios Officiales, nil negligatur, & mul-
to minus, quicquā perperam committatur. Factores autem Præ-
diorum, ad mensam fratrum pertinentium, non Religiosas sed se-
culares personas, quarum fides & dexteritas, in Administratione
bonorum fuerit commendata, in posterum constituat.

Et si autem institutio Custodis, hætenus à sola ipsius Præpositi
Generalis voluntate dependebat, quia tamen vniuerso Ordini no-
stro plurimum interest, vt talis huic muneri præficiatur, qui ei, pro
dignitate & vtilitate Religionis, sufficere possit; Ideò consultius
esse ducimus, vt in posterum ad electionem ipsius, non tantum
Fratres præsentés, sed etiam Consiliarii aduocentur, & ipsius elec-
tio, capitulariter instituatur. In potestate tamen Præpositi erit, eū
quem fratres elegerint confirmare, aut eo repulso, vt alteri magis
idoneo, vota sua ferant postulare. iuxta Constit. 17. Lib. 3. Cap.
Gen. Scñdi de electione ad Ordinis beneficia præscriptam.

Cum autem in religione nostra antiqua consuetudine sit rece-
ptum, & Constitutionibus ordinis comprobatum; quod Custos;
alterum post Præpositum Generalem in Conuentu locum obti-
neat. Hortamur fratres, vt illi debitum honorem & obsequium o-
mni tempore exhibeant, ac eius iussa atq; monita; non aliter
quàm nostra accipiant, in omnibusq; libenter illi obtemperent;
quoties verò Chorum, vel commune Refectorium, ingreditur, o-

omnes assurgant, ac debitam Reuerentiam ipsi præstent.

Verùm cum ipsum nonnunquã, negotiorum Monasterii causa, à Conuentu abesse contingat, in locum ipsius Vicecustos, quem nos pro tempore elegerimus, succedet, atq; prædicta omnia munia, ad Custodem pertinentia, exequetur. Præsente autem Patre Custode Vicecustos attentè mores fratrum obseruabit, & illorum defectus, præsertim in Diuinis Officiis, diligenter notabit, ac negligentes primo quidem officii admonebit, deinde verò si ipsius monita non curauerint, Patri Custodi deferet, vel si res moram patietur, in Capitulo particulari negligentiam illorum accusabit. Cui etiam Fratres, non minorem honorem, & obediẽtiam, quàm ipsi Custodi in posterum exhibere debebunt.

DE OFFICIO.

CONSILIARIORVM.

QVoniam in Ordine nostro, consilarii eo fine sunt instituti, vt eos in rebus Ordinis difficilioribus, Reuerendissimus Dominus Generalis, & Custos conuentus, fidos socios & consortes, laboris sui habeãt; vbi enim multa consilia, ibi necesse est multam esse salutem; Proindè quotiescunq; in Conuentum negotii alicuius tractandi causa vocabuntur, promptè & libenter se sistant, & rogati, consilia sua, syncerè & candidè explicant.

Et si quid in Ordine perperam fieri aduerterint, Reuerendissimo, cuius id potissimum interest, vel in ipsius absentia, Custodi deferant; mala enim faciliùs in ipsis initiis corrigi possunt, quàm cum ob dissimulationẽ sumpserint incrementa. Sicut autem ceteris fratribus præstant dignitate, ita exemplo, doctrinaque sua illis præluceant, atq; ad pietatem & vitam religiosam; cum timore Dei transigendam duces sint.

Illorum

Illorum etiam muneris erit attendere, vt iura & Privilegia, huius Almi Conuentus, atq; adeò omnium Conuentuum & Ecclesiarum, Ordinis nostri fideliter, hic in consueto Archiuio, sub firma clausula conseruentur. Clauelq; tam ab Archiuio, quàm à sigillo maiori, à duobus vicinioribus è medio illorum, vnà cum Custode pro tempore existente, retineantur.

Ad Electionem quoque tam Custodis, quàm eorum, qui beneficiis, siue Ecclesiis praticiendi sunt, si præsertim, qui erunt viciniore, accersentur; ac contractus locandorum prædiorum, siue ad mensam Reuerendissimi, siue ad mensam Fratrum spectantium, cum consilio & leitu ipsorum, in posterum fieri debent.

Quoniam autem plurimum interest, quales personæ in Consilium adhibeantur, ideò eorum vita & doctrina diligenter à Capitulo Generali examinari debebit, quos autores Consilii publici, Conuentus habere voluerit, liberumq; erit, singulis Generalibus Capitulis, Reuerendissimo, iuxta beneplacitum suum, alios atque alios, quos huic officio & muneri aptiores esse aduerterit surrogare. Illa autem Constitutio quæ in Cap. 1. Gen. Consiliarios veluti loco affixos deputat, temporari accomodata censenda est. Fuerunt enim illo tempore, circa dicta loca, personæ habiles, & ad danda consilia sufficientes. Ita tamen vt inter quatuor Consiliarios, vnus ex residentibus fratribus, qui Reuerendissimo magis idoneus videbitur, in posterum constituatur, quatenus tam ipsi Generali Præposito, quàm Custodi in grauioribus negotiis, à Consilio præsto esse possit.

DE CONSERVATORVM DOMUS, seu Vestiariorum officio.

Vestiarii quibus quæstura, seu procuratio omnium Proventuum

C

ad Con.

ad Conuentum spectantium, demandata est, officio suo per omnia fideliter respondeant, & singulis Mensibus coram Custode & Capitulo, omnium perceptarum & expensarum quotidianarum exactam rationem reddant.

Vestiarix, qui locus est communis, ad vestes & res necessarias Fratrum deponendas, deputatus, diligentem curam habeant. Et vt sepe pannus, tela, calcei, & alia necessaria ibidem sint in promptu, ac ne fratribus aliquid desit, diligenter prouideant, & Custodem (quo inconsulto nemini quicquam dabunt) tempestiue ea de re pramoneant.

Cum autem pensio florenorum 100. ex bonis mensæ Fratrum, in 3. capitulo Generali, pro necessitatibus Vestiarix, assignata, nequaquam sit sufficiens, ideò Reuerendissimus Dominus Generalis, pro suo Paterno in Fratres affectu, ex bonis mensæ suæ, in eum vsum, nomine pensionis Annuæ, pro singulis Festis S Michaelis ad manus vestiariorum soluendæ floreno. 200. perpetuò assignat, & vt pro hac vtrâq; summa simul iuncta, singulis annis prædicta necessaria ad vestiariam comparentur, statuit, & ordinat. Quod si, nec hæc summa in eum vsum fuerit sufficiens, residuum ex redditibus ad mensam communem spectantibus, suppleri debet, ita vt nequaquam Fratribus aliquid necessariorum desit.

Vestiariorum quoque curæ erit, vt libri in Bibliotheca Monasterii depositi, à pulueribus, & tineis sæpius excutiantur, & ordinatè ac suis locis collocentur, vtq; index illorum sufficiens semper habeatur, quorum vnus circa vestiarios, alter penes prælatum retineatur. Nec alicui Fratri ex Bibliotheca extradentur, nisi nomine tam Fratris librum accipientis, quàm Authoris libri, in tabulam seu in schedam ad id atfixam memoriæ causa relato.

Etli verò omnium bonorum ad mensam Fratrum pertinentium administratio ad illos pertineat; eadem tamen bona, irregulisco

consensu

consensu Reuerendissimi & Consiliariorum non elocabunt, nec de vendendis decimis, ad mensam Fratrum pertinentibus, in scio vel in consulto P. Custode, aliulq; Fratribus in Conuentu presentibus quidquam statuere poterunt. Illi autem Fratres qui tempore decimationis, ad hoc negotium deputati fuerint, sobrie, & tempestiuè ad Conuentum redire debebunt.

DE O F F I C I O.

THESAURARII & SACRISTÆ Senioris, qui idem & Magister Cæremoniarum.

QVandoquidem ex antiqua consuetudine huius Ecclesiæ, duo Fratres ad suppellectilem Ecclesiasticam cōseruandam designari soleāt, alter quidem in Thesauro, alter verò in Sacristia. Atcedet Pater Custos, vt vterq; suo munere rectè & sedulo fungatur.

Et Thesaurarius quidem conscripto suppellectilis preciosioris, quæ in Thesauro cōseruari solet, sufficiēti Inuentario, diligenter argentum Ecclesiæ, & vestes pretiosiores asseruabit, nec eas ad vsum faciliè extradet, nisi solemnitate festi, vel Personæ qualitate id exposcente.

Reliquiarum quoq; sacrarum, indicem, à nobis nupèr conscriptum, semper in promptu habebit. Ipse autem Reliquiæ tam quæ in Crucibus, quàm quæ in Thecis argenteis, & Cistula cum Cardinalibus & sera argenteis, sunt depositæ, vnà cum Authentico, à S. Carolo Borromeo super easdem reliquias, Illustrissimo olim Cardinali Bathoræo Conuentus huius Præposito concessas, subscripto, & obsignato, in Armariolo decenti, nupèr ad id præparato, maiori studio & reuerentia, quàm hactenus factum comperimus, à The-

thesaurario seruentur, & nemo audeat in posterum quidquam de illis detrahēre, vel cuiquam donare, sub pœna Excommunicationis ipso facto incurrenda.

Dum verò Sacre Reliquiæ in publicum exponuntur, ab ipsis Presbyteris superpelliceis indutis, præmissis luminaribus, summa cū Reuerentia in altare deferantur, & rursus in Sacrarium reportentur. Idem & Præuilegia Ecclesiæ diligentèr conseruabit, & eorum Summarium indicem nuper conscriptum, in Thesauro retinebit, vt facilius cum aliquod Præuilegium requiretur, per eum reperiri possit.

Sacrista autem curabit, vt suppellex Ecclesiastica, ad Sacristiam pro communivsu, à thesaurario, sub Inuentario sibi tradita, mundè & ordinatè conseruetur, & si quæ fuerit lacera resarciatur. In quem vltim cum nulla Prouisio antea facta fuerit, assignat Reuerendissimus ex prouentibus Mensæ suæ, Pensionem annuam floren: 100. perpetuis temporibus ad manus Senioris Sacristiani, vel Thesaurarii reddendam. Quam ille pecuniam, cum scitu Custodis in reficiendam vestem sacram, vel nouam, ex viliori materia pro quotidiano vsu comparandam conuertere, & de illa singulis annis Præposito Generali vel Custodi, cum Vestiariis, rationem reddere erit adstrictus.

Sacras autem Vestes, Missam celebrare volentibus, promptè exhibeat, & ea quæ sunt ad altare necessaria, tempestiuè per se, vel per Iuniorem Collegam suum subministret. Ac præterea Venerabile Eucharistiæ Sacramentum, Æstate octauo quoq; die, Hyeme verò decimo quinto renouet, & in renouatione fragmentorum diligentem cūram habeat.

Idem etiam munus Magistri Cæremoniarum obibit. Cui omnes fratres sine contradictione, in iis quæ ad Cæremonias & Diuina officia ritè obeunda pertinent obediant, sub pœna arbitraria per
nos vel

nos vel P. Custodem contrauenientem, ex delatione dicti Magistri, imponenda.

Officium autem Magistri Cæremoniarum, hoc primum erit, vt denuntiet singulis Fratribus suum officium, circa Diuina Ministeria adimplendum; vel potius in tabellam singulis Hebdomadis referat, qui, quo tempore, quouè ordine, inferuire debebunt. Diebus verò Festis post Missarum solemnia lectum Sacrum in vsum aduenarum referuabit.

Curabit præterea, vt Fratres recenter ad Ordines Sacros promoti, in officio ordini suo annexo diligentè se exerceant, & vt omnia rectè deceterq; circa Diuina officia fiant, iuxta præscriptum cæremonialis & Rubricas Missalis Romani.

Idem aduertet vt Presbyteri adminus octauo quoq; die, Pænitentiariis ad id deputatis peccata sua confiteantur, & singulis diebus Festis (nisi quis illorum legitimè fuerit impeditus) missas celebrent; Celebraturi verò, vt vnico saltim quadrante antequam ad altare accedant, Orationi mentali vel vocali vacent, atq; idem peracto Diuino officio faciant, iuxta puncta meditationum ad calcem officiorum ordinis inserta. Qui autè hac in parte fuerint negligentes, eos Capitulo Septimanali deferat.

Præcauebit etiam ne expectèt Eleemosinarū aggregationē celebraturi, sed ex Præscripto officii, singuli munus suū obeāt. Peregrinos item & vagos Presbyteros nō permittat in Ecclesia celebrare, donec testimoniū Canonice Ordinationis exhibuerit. Idem etiā die aliqua solempni instante, cum Rndissimus Pontificaliter est celebraturus, ministrantes tempestiuè ordinabit, & vt ab iis Cæremonia iuxta præscriptum Cæremonialis Romani obseruentur, diligenter attendet. Ac præterea in eadem solempnitate ad Primas Vesperas, binos Præcentores assignabit, qui pluuijalibus, induti, in vtriq; Vesperis concorditer præcinent Antiphonas, & Versus a-

perta voce, dum organa pulsantur legant. Quibus etiam diebus, vt omnes Fratres superpelliceis induti, Missarum solennis in Choro, & sacris Concionibus intersint, idem Cæremoniarius aduertet, & negligentes P. Custodi denunciabit.

DE OFFICIO SACRISTÆ IUNIORIS.

Sacristæ Præsbytero adiungi debet Clericus, in maiori aliquos Ordine Constitutus, propter attrectanda vel deferenda vasa sacra. Cuius officium erit, præparare & studiose adornare altaria, Calices, Corporalia, & Purificatoria munda, celebrantibus decenter subministrare, Hostias, vinum, aquam claram & mundam, vrceolos, cereos. ignem ad vsum rei sacræ, opportuno tempore parata habere. Externis & aduenis à Seniore Sacrista admissis, volentibus celebrare, vestes sacras libenter & cū charitate ministrare.

Lauacrum tersum, cum munda aqua & mantilibus mundis in numero sufficiente, peluim item pro abluendis Corporalibus, & Purificatoriis, providere. Vasculum Aeneum pro carbonibus in Ecclesiam deferendis, Forcipes pro Hostiis scindendis, Lampades plures pro necessitate occurrente, Vasa olearia magna ad vsum lampadis, Lucernas duas hastis affixas, ad vsum deferendi venerabile Sacramentum ad infirmos, Tripodes cum vasis ferreis super impositis ad ignem deportandum, Turribula, Maleolos, ad affixionem tapetum, Scopas maiores ad purgandum Templum, Minores ad vestes excutiendas ac reliqua. &c.

Suppellectilem in vsum Sacristiæ in promptu habere, Personas Laicas, & ad seruitium Diuinum nō pertinentes, à Sacristia arceri. Ad fores Sacristiæ, Vasculum Aeneum vel stanneum, cum aqua benedicta

benedicta, & aspergiolo decenti habere. Hostias recentes & benè à fragmentis purgatas, in vase mundo, plumbeo circulo deluper tectas, reſeruare, & pro iis conficiendis ferrea instrumenta, & farinam triticeam recentem, & mundam, tempeſtiuè prouidere, ut què *Æſtuo* tempore ſingulis ſeptimanis, *Hyemali* verò ſingulis quindecim diebus pinſentur, attendere.

Metricam Baptizatorum & Matrimonia contrahentium, Miſſalia, ac reliquos libros, pro communi neceſſitate & commoditate Eccleſiæ ſeruientes, utpote librum Agendorum, Graduale, Pſalterium, Libros ad cantum Eccleſiæ ſpectantes, &c. ordinatè & diligenter aſſeruare; Et ut præterea ſuper ſingula altaria Tabulæ Secretæ Miſſæ continentes habeantur; ut pauimentum Eccleſiæ à ſordibus mundum conſeruetur, & quoties in Eccleſia mortui ſepeliuntur, ut lapides ſepulchrorum reliquo pauimento coæquentur; ut ad Eccleſiam & Sacriſtiam ſeræ ſint firmæ, ut Eccleſia debito tempore claudatur, & tempeſtiuè propter laborioſos homines aperiat; Ut ad ianuas Eccleſiæ intus aqua benedicta in vaſe conuenienti, munda, noua, & clara ad uſum introeuntium cum aspergiolis binis retineatur, & ut Cæmeterium de nocte claudatur, prouidere. Ne deniq; in porticu Eccleſiæ colloquia aliqua profana & inhoneſta tam à ſecularibus quàm à Religioſis miſceantur, neue aliquid in ea indecens admittatur, prohibere.

O F F I C I U M C A N T O R I S.

Cantor ordinarius per Cuſtodem iſ ex Fratribus aſſignetur, qui Diuinis officiis in choro præſſe, & qui diſparitatem & diſſonantiam canentium moderari ſciat. Fratres autem ad Antiphonas

phonas & Responsoria cantanda, dato per Cantorem signo omnes assurgant, & ea æquali voce decantent. Hebdomadarii vero in cantu horarum alternatim intonent, ac cæteris in cantando præeant.

DE OFFICIO.

MAGISTRI NOUITIORVM: ET DE Institutione tam in Nouitiatu existētium quàm Iuniorum Fratrum Professorum.

Magister Nouitiorum educationi & informationi, non tantum Nouitiorum, sed etiam Diaconorum, Subdiaconorum, & clericorum Professorum, attendere & diligenter aduertere debet, vt prædicti omnes tonsuram, & habitum talarem, ordini congruentem deferant; Confessionem ad minus bis in mense Magistro vel ordinariis penitentiariis, ad confessionem aliorum Fratrum excipiendas, deputatis, faciant, & sacram Communionem semel in mense, præter dies Festos solemniores, frequentent; ac vt ea omnia sciant, quæ ad eorum munia ritè obeunda spectant. Si qui autem Nouitiorum officio suo suo defuerint, eos seriò corripiat & in eorum vitam & mores diligenter inquirat: Illaque omnia obseruet, quæ in Constitutionibus Capitulorum Generalium, de iis laudabiliter præscripta habentur,

Porro si quis Nouitiorum in Nocturna vel furtiua egressione è Monasterio deprehensus, vel cum mulieribus, in scio Magistro collocutus fuerit, vel furtum de rebus Monasterii, aut Conuentus fecerit, vel lusui Chartarum & alearum indulserit, eundem à Magistro Nouitiorum primum Patri Custodi, deinde toti Capitulo denunciatum, statim è Monasterio, & è societate Fratrum eiciendum

endum decernimus. Si quis verò ex Professis Iunioribus, in tali (quod absit) delicto repertus fuerit, præter pœnas in Constitutionibus prioribus ordinis determinatas, etiam selsionem vnus septimanæ in arctioribus Carceribus, & trium dierum Ieiunium in pane & aqua, talem omninò subire debere declaramus. Præcipuè vero curæ Magistro Nouitiorum erit, vt Nouitii non tantùm eos labores, quos Fratres ferre solent, subeant; sed etiam vt iuxta consuetudinem septimanatim assignati in Refectorio mensas mundas, & nitidas semper retineant. Aquam recentem in lauaterio mundo tempestiuè subministrant: Dormitorium & Refectorium purgent, & in aliis humilitatis officiis diligenter se exerceant: Singulis item diebus Dominicis & Festis, bini sub cantu Euangelii candelabra gestatoria, cum cæreis accensis teneant, & præterea candelas gestatorias ad eleuationem venerabilis Sacramenti accensas, iisdem diebus, ante maius Altare, proferant.

Cum autem ad rectam Nouitiorum institutionem, plurimum cōducatur si separatam à reliquis Fratribus (prout in aliis Cænobiis rectè institutis videmus) mansionem habeant, vt videlicet quietius suis muniis attendere, & Spiritualibus exercitiis liberius vacare possint; Ideo curæ erit nobis, vt primo quoque tempore Nouitii vna cum Magistro suo, non tantum suum hypocauftum à communi Refectorio distinctum, sed etiam cubicula à reliquo Dormitorio, peculiari clausura separata habeant, & Professis fratribus, nisi cum ad Diuina officia, vel ad mensam procedendum erit, non se immisceant.

Ibidem etiam Lectiones (quæ vt singulis diebus professis pro capto Auditorum, binæ, altera sacra, altera prophana habeantur, Præposito Generali curæ erit) iis prælegentur; quibus singuli tam Nouitii, quàm iuniores Fratres Professi interesse debebunt; vt autem non minus in studiis, quam in pietate & timore Dei maiorem

D

in dies

in dies profectum facere assuecant, eis singulis diebus partem pñ
 alicuius libelli, Magister Nouitiorum perleget, & eos in omni pie-
 tate, & religione sedulò informabit. Porro cum omnibus Religio-
 nibus plurimū inde dignitatis & utilitatis accedat. Si plures viros
 doctos & eruditos habeat, ideò de cōmuni omnium Fratrum con-
 sensu statuimus & ordinamus, vt non tantum expensione annua
 de Præposituræ Wrocimouiē. prouentibus, in Cap. 3. Generali
 assignata (quam tamen ob temporum iniquitatē, vita moder-
 ni Præpositi durante, ad flor. 80. post obitum autem ipsius ad
 centum quinquaginta florenorum, moderandam esse duximus.)
 tot Fratres continuò in Academia Cracouiensi foueantur, quot inde
 ali possunt, sed etiā cum Præpositura Gnesnensis, habeat non con-
 temnēdos redditus, onera autē ad exigua illi sint annexa, vt in poste-
 rū Præpositus Gnesnensis (moderno duntaxat excepto) sumptu suo
 duos Fratres à Præposito Generali delectos in Collegio Posnan-
 ensi, vel Calisiensi, prout eidem Generali videbitur, alere, & eod-
 dem omnibus necessariis prouidere, perpetuis temporibus sit a-
 strictus.

DE OFFICIO MAGISTRI INFIRMORVM.

CVM Fraternalis Charitas, quæ est vinculum omnium Religio-
 num, circa Fratres in Infirmirate constitutos, maximè eluce-
 scat, volumus vt iuxta Constitutionē quintam, Cap. Gen. 3. præ-
 sciatur Capitulariter semper vnus ex Patribus, qui habeat curam
 Infirmorum, & bonorum ad Infirmariam pertinentiū. Quæ nuper
 prædio Gluchow, à nobis ad id deputato, sunt aucta. Sit autem
 Magister infirmorum & viribus validus, & charitate feruens, qui
 sciat condolere infirmis, & eis obsequia conuenientia præstare.

Is autem

Is autem Inventarium Autenticum, manu Patris Custodis subscriptum, de omnibus ad Infirmariam spectantibus, habeat; & rationem suæ administrationis, singulis Anni Quartualibus, eidem Patri Custodi & duobus Fratribus, ex Capitulo deputatis, reddere teneatur.

Locum Infirmariæ, lectulos, pulvinaria, lintheamina, & aliâ suppellectilem purgari crebro faciat, & munda retineat, provideatq; ut omnia necessaria, ad infirmorum curam pertinentia, præsertim verò Surrupi, & cætera medicamenta, iuxta præscripta medicorum, infirmis debitis temporibus ministrentur. Et cibi non communes sed meliores & molliores, pro necessitate illorum, provideantur. Frater autem infirmus, dum adhuc est viribus integris, in manus Patris Custodis, & Magistri Infirmorum libros & omnem suppellectilem, cuius hætenus usum habuit resignet, & se ab omnibus expropriet; Ea autè quæcunq; resignauerit, fideliter per Magistrum conscribantur, & conseruentur. Et eidem fratri, si conualuerit restituantur. Si verò è viuis decesserit, ad usum Monasterii, cum scitu Præpositi Generalis, iuxta ordinationem, in Capitulis Generalibus præteritis factam, conuertantur.

Præcipuè verò idem Magister, infirmum Fratrem, ad deuotam Sacramentorum perceptionem, tempestiuè hortabitur, & ei agonizanti, & ipse diligenter assistet, & ut alii assistant, P. Custodem tempestiuè præmonebit, librosq; ad animam cõmendandam spectantes, vtpotè Polancum, & Ianussouiu de arte moriendi, in pròptu habebit. Ac reliqua omnia obsequia pròptè & alacriter ei præstabit, vberem eius laboris mercedem à Deo recepturus.

Quod si circa curam Infirmorum fuerit negligens, talis priuatione officii puniatur, & alter in locum eius substituatur.

Inquiremus autem & nos ipsi sollicitè, de defectibus infirmorum & diligentia paternam, circa valetudinem ipsorum, adhibebimus.

DE OFFICIO
DISPENSATORIS, ACCVLINÆ,
Cælarii, & Molendinorum, Prouisorum.

Singuli horum eligantur in Capitulo de consensu maioris vel sanioris partis, qui sint viri boni, prouidi, fideles, solliciti, & in re Oeconomica benè versati.

Quorum munus erit, communicato cum Patre Custode & Vestiariis Consilio, omnia necessaria, pro victu Fratrum tempestiuè procurare, & vt cuilibet eorum debita carnum, Piscium, Panis, ceruisæ, portio obtingat, diligenter prouidere.

Ita tamen ne quis portione, quæ sibi obtigit, tanquam propria vtatur. Sed si quid reliquum fuerit, id non pueris, quos deinceps, nullus sine expressa superioris licentia tenere præsumet, affinitate coniunctis, vel ad obsequia assumptis concedatur, verum arbitrio superioris distribuatur, iuxta præscriptum Cap. Generalis secundi. Lib. 3. Constitut: 7.

Porro, cum dicti Officiarii, plerunq; inordinata cupiditate, emolumentū sibi quærere de bonis Conuētus non vereātur, & propter sua priuata commoda, magnam sæpenumero iacturam in bonis communibus faciant, prætendentes id sibi licere propter labores & molestias, quas in tali obsequio sustinent.

Proindè præcauentes ne in posterum aliquid huiusmodi facere præsumant, statuimus vt si qui tales ex rationibus singulis mensibus Patri Custodi, & Vestiariis reddendis, depræhenſi fuerint, ab eo officio statim ammoueantur & præterea seuerè puniantur.

DE OFFICIO IANITORIS.

Statuimus vt in posterum portitor siue Ianitor (qui ad Ianuam Conuentus in Hypocausto, ad eum præcipuè vsum, nouiter constructo, semper inuigilet) fidelis à Patre Custode instituat. Huius officium erit, ne quam ex prohibitis personis, iuxta Bullam summorum Pontificum Pii V. & Gregorii XIII. septa Monasterii ingredi patiat, illaque omnia arctissimè præcaueat, quæ Const. 6 Lib 3. cap. Gen. 2. de clausura in constitutionibus expressa, habentur. Idem diligenter illos Fratres obseruabit, qui cum mulieribus colloqui, à Patre Custode vel qui illam dare potest, facultate non accepta, præsumperint, & tales Patri Custodi, nil disimulando, deferet. Neminem præterea nisi licentia à superiore obtenta (quam ille binis tantum, idq; hora reditus præfixa, concedere debet) extra claustrum egredi permittet, & vt portæ claustrum semper clausæ habeantur, diligenter aduertet.

Quod si quempiam ex Fratribus, per falsas & secretas portas de Conuentu, siue noctu, siue interdiu, egredi & extra Conuentum pernoctare cognouerit, de tali mox Patri Custodi significet, eumq; manifestet, vt pro tali & tanto crimine eas pœnas luat, quæ superius sunt expressæ, alias si P. Custodem de aliquo celauerit, Carceris, vel aliquam aliam Pœnam, arbitrio eiusdem imponendam, ipse subire debet.

Eiusdem quoque officium erit. In Dormitorio noctu, antequàm se Fratres Cubitum conferant, lumen in lucerna affixa tenere, & iterum quando datur pulsus ad Matutinum, illud accendere.

DE OFFICIO

OMNIVM FRATRVM IN CON-
uentu manentium, tam quo ad vitam reli-
gioſe instituendā quā quo ad Sacramen-
ta ritè adminiſtranda.

Cym præcipuum ſtudio Religioſorum eſſe debeat, conari
die noctuque, vt anima illorum per orationem & contempla-
tionem Deo ſit coniuncta. Ideo Fratres omni ſtudio & diligentia
orationi & contemplationi quā ſæpiſſime vacare, & mentem
ſuam in Deum eleuare, omneſque actiones ſuas ad præſcriptum
Regulæ, & Conſtitutionum Regularium, dirigere debent. Qui
enim in Conuentu, vitam Profeſſioni ſuæ conſentaneam, non a-
gunt, fruſtra viuunt in Monafterio, Fundatoresque decipiunt, qui
pias & religioſas illorum eleemoſinas indignè abſumunt.

Præcipue autē Temperantiam ſanctam, in eſca & potu (in quo
meſura in Cap. Gen. 1. cap. 7. deſcripta, in poſterum obſerua-
ri debet) ſeruēt; quatenus omni die, ad tremendū illud Miſſæ ſacri-
ficiū peragendum, dignè accedere ſint parati; vtque preces eorū,
quas fundunt pro plebe, in conſpectū Dei aſcendant, & ſint ad im-
petrandum, id quod petunt, efficiores. Ebrietatem autem veluti
vaſtum quoddam vitiorum omnium Pelagus, ſummo ſtudio fugi-
ant. Nihil enim minus decet Religioſos, quā computatio & co-
meſſatio. Siquidem tales, Monafterium poenitentię & ſobrieta-
tis receptaculum, in luxus, deliciarumque voraginem, cōmutant.

Inuicem ſibi honorem deferant; Iuniores Preſbytero venienti
in Eccleſiam, vel in Commune Hypocauſtum, alurgant, & de-
bito ho-

bito honore eum præueniant. Cum autem male dictus sit homo, qui opus Domini facit negligenter. Ideò diuina officia, iuxta distributionem horarum à nobis præscriptam, & circa finem Constitutionum Præsentis Capituli, insertam, attentè & distinctè absoluant, & in iis piè, ac deuotè, se gerant; Psalmos, & Lectiones (quæ etiam à Presbyteris legi per ordinem debent) distinctè pronuntient, memores præsentis Dei, in cuius conspectu, vnà cum purissimis illis Angelicis Spiritibus, laudes Diuinas decantant.

Ad prolationem autem nominis Iesu, Beatissimæ Mariæ Virginis, vel Gloria Patri &c. capita aperiunt, & reuerenter assurgunt. Presbyter item Homiliam lecturus, semper in medium iuxta antiquam consuetudinem, egrediatur.

In Chorum quoties veniunt, genu flectant, & antequam Stallum ingrediantur, vnā Orationem Dominicam, & Salutationem Angelicam dicant. Eodem quoque ordine è Choro discedant. Sub tempus autem horarum Canonicarū, non debent inde exire, nisi urgente necessitate, licentia tamen prius à superiore accepta.

Circa mediam noctem (diebus Festis solemnioribus, in Distributione horarum infra apponenda, specificatis, exceptis: quibus propter populi commoditatem, circa tertiam horam post mediam noctem, in Choro inferiori, præmisso competenti pulsu, & Foribus Ecclesiæ apertis) in posterum Matutinum decantari debere censemus. Signo dato omnes ad decantandas matutinas preces, protinus se se in Oratorium cōferant, præcincti zona, supra tunicas vel pelliceos. Eos autem qui ad decantandum matutinum non veniunt. Prima quidem vicè vno ferculo, altera duobus, tertia omnibus ferculis prandii atq. potu Pater Custos priuet. Quod si aliquis amplius negligens esse perexerit, ad extremum nobis tam negligentem & desidem Fratrem denunciet.

In absentia autem nostra, eum publicè in Capitulo coarguat, &

saltem

talem Pœnitentiam ei assignet, vt correctus nunquam posthac officio suo desit, qui autem aliquam ex horis diurnis intermiserit, is pro hac negligentia, quinque Orationes Dominicas, tempore Prandii, flexis in terra genibus, recitabit.

Cum verò ad vitam Spiritualem instituendam, & Diuinum amorem concipiendum plurimum, oratio mentalis conducatur, iuxta id quod ait Psalmista. In meditatione mea exardescet ignis. Ideò Fratres singulis diebus, iuxta Præscriptum, in distributione Horarum inferius insertū, adminus vnā quartā horæ Orationi mentali (sumpta Methodo, in libello de vita religiose instituenda, Autore Patre Aluares Societatis Iesu, descripta) vacabunt. Vespertino autem tempore, non prius se cubitum conferent, quàm examen conscientie iuxta Præscriptum eiusdem libelli, (vel quod ad calcem patronorum Ordinis habetur) præmiserint.

Const. 6. Cap. Gen. 2. de Clausura Conuentus, similiter Constit. 2. Lib. eiusdem, de fugiendis colloquiis & familiaritate cum mulieribus, Fratres exactissime obseruent, Quòd si quis transgressor illarum repertus fuerit, & si cum mulieribus licentia non obtenta, colloqui, vel per falsas & secretas portas, de Conuentu noctu vel interdiu exire, & extra pernoctare audeat, preter pœnas in Constitutionibus Ordinis determinatas, etiā sessionem triū dierū in arctioribus carceribus, talem subire debere, declaramus.

Lusum chartarum, alearum, ac tessellarum omnino in Conuentu prohibemus fieri, deprehensi autem, in pane & aqua, ieiunare vniū diem cogantur.

Habitu honestum non tamen superfluum, huic nostræ religioni peculiariter in præteritis Capitulis assignatum omnes deferant, præsertim verò Pallium ad brachia emittēda scissum, & Cruce rubea geminata insignitum.

Arma in cellis non retineant, sed si quæ pro vsu itineris habuerint, ea in communi Vestuario asseruanda, deponant.

In Cellis finguli detineant imaginem Crucifixi, & alias pias Sā-
ctorum imagines, illas autem non habenti, de comuni carbona
ex sorte eum concernenti per Patrem Custodem cōdemantur.

Silentium omni tempore ab omnibus Fratribus in Choro, Re-
fectorio, & in Dormitorio seruetur, excepta vna hora recreationis
post prandium, & altera post cēnam seu sessionem, ac media post
horas Vesperarum. Si vero improbitas vel importunitas alicuius
Fratris absq; licentia superioris, & absque vrgenti causa silentium
fregerit, vel distributioni horarum non attenderit, à Patre Custode
puniat, prout superius de officio Custodis est expressum.

Literas in scio Superiore nec ab aliis recipiant, nec ipsi mittant,
& eas in posterum sigillo communitalis obsignent. In omnibus
denique actionibus ita se Fratres gerant, quemadmodum Regula
ipsa, quæ totiūs Religiosæ vitæ normam tradit, & vocatio illorum
requirit.

Porro quandoquidem huic Ecclesiæ nostræ Conuentuali anne-
xa est cura animarum, hortamur plurimum omnes Fratres vt Sa-
cramenta Parochianis decenter & tempestiuè administrent, iuxta
præscriptum Capituli Generalis Secundi toto lib. 1. quem dili-
genter quilibet Presbyter perlegat, & quantum fieri potest memo-
riæ mandet. Librum etiam Agendorum & Epistolam ad Parochos,
singuli præ oculis habeant, & in administratione Sacramentorum
se, quàm maximè eis accomodent.

Quoties Sacramentum Baptismi administrari contingit, ipse
Presbyter superpelliceo indutus, reuerenter per seipsum, non ve-
ro per Clericum (quod hactenus minus decenter fieri consuevit)
Olea sacra ad fontem deferat : gratis & promptè (nisi si quid spō-
te ratione elemosinæ offertur) vt alia Sacramenta, ita & hoc ad-
ministret, & quidem cum actuali intentione regenerandi homi-
nem in Christo, & faciendi quod facere intendit Ecclesia, adhi-
bita de-

bita debita materia & forma. Aqua autem capiti infantis infusa, in vas ad id destinatum excipiat, ad eamque superfundendam non vola manus, sed cochlear aliquod argenteum vel stanneum paruum adhibeatur.

Illi qui ad Confessiones excipiendas pro tempore fuerint destinati, & ab officio approbati ea omnia quæ in lib. I. Constit. 5. cap. 2. Generalis præscribuntur ad amussim obseruent, ac præterea nouerint, quæ sint Pœnitentiæ partes, quæ huius Sacramenti necessitas, quæ Materia, quæ Forma, quis illius effectus, quis minister, quæ conditiones in eo requiratur, quæ regulæ ad dignoscendum & distinguendum peccatum mortale à veniali, quando & quibus de causis confessio est iteranda, quæ sint circumstantiæ peccatorum, & quæ mutant speciem peccati, quæ restitutionem postulent, quibus criminibus annexæ sint censuræ, qui denique Casus sedi Apostolicæ, & qui Loci ordinario referuntur, &c. Sciant item pro statu cuiusque personæ accomodandum esse excipendarum confessionum modum, vt aliter eorum qui Matrimonio iuncti, aliter Continentium, aliter Laicorum, aliter Clericorum, exploretur conscientia.

Qua in re, vt Confessarii tanto diligentius se exerceant, plurimum expedire iudicamus, si per duos eruditos Fratres in Capitulo Generali ad hoc munus deputatos, singulis quatuor anni temporibus, de profectu in studiis, Casuum conscientiæ examinetur. Et quomodo peccatorum rationes & discrimina cognoscere possent, informetur. A quibus etiam illi qui Ordinibus sacris adscribendi erunt antequam ad Episcopos mittantur, examinari debebunt, an ea eruditione sint præditi quam illius gradus, ad quem promouendi sunt functio desiderat, iuxta Constitution: 6. libro. 2. Cap. Gen. 2.

Propter Religiosos verò cōfiteutes necessariū omnino videtur,
vt Con-

vt Cōfessarii Ordinis nostri Casus Religioſorū reſeruatos nouerit, à quibus iidem, non niſi à propriis Prælatiſ, vel ab illorum ſubſtitutiſ abſolui poſſint. iuxta ordinationem Bullæ à Clemente Oſtauo. quæ in officio Patronorum Ordinis inſerta habetur, ſuper ea re emanatæ. ſecundum quam & Conſtitutio illa, quæ lib. 2. Cap: Gen: 2. de Caſibus ſuperiori Ordinis noſtri reſeruatiſ habetur, eſt moderanda.

Eucharistiæ Sacramentum cum in Eccleſia diſtribuitur, candel-la accenſa à Clerico ſuperpelliceo induto præferatur. & mantile mundum, vel Patina mentò communicantium ſupponatur.

In Pixidibus ſeu Vafiſ cum ad Infirmos, in Ciuitatem itur, ſint cōſecratæ adminiſ duæ vel tres Hoſtiæ, vt in reditu remaneat Hoſtia quæ à populo adoretur.

Quoties verò Preſbyter deſert ad Infirmum Diuiniſſimum hoc Sacramentum, ſemper deinceps adhibeat Clericum coadiutorem, ſuperpelliceo indutum. Adhiberi etiam debet cātus per duos Scholares, à nobiſ & à Fraternitate S. Annæ ſalariatos cum luminibꝯ accenſiſ inter eundem & redeundum. Preſbyter autē deferens ne minimum quidem oculos à Sacratiffimo Sacramento remoueat, & antequam domum infirmi ingrediatur, præmittat, qui locū præparet pro decenti huius Sacramenti collocatione. Infirmumqꝯ; verbiſ ad id idoneiſ hortetur, vt humileſ Deo gratiaſ agat quod dignaretur ad ſe venire, ac poſt ſūptionem iterum moneat; vt acceptam per hoc Sacramentum gratiam, in ſe diligenter conſeruet.

In Concionibꝯ quoqꝯ; frequētèr populuſ moneatur ad hoc Diuiniſſimum Sacramentum cōmittandum, pro poſitiſ indulgentiſ à Sūmiſ Pōtificibꝯ, iſ qui huic tam pio operi interſuerint, cōceſſiſ.

Vluſ Sacramēti Extremæ Vnctioniſ ſimilitèr à Cōcionatore ſæpiuſ populo inculcetur, & Infirmiſ quotieſ illud poſtulauerint, nō differatur adminiſtrari.

Presbyter autem cum Clerico, accepto superpelliceo & stola cum vasculo olei infirmorum, atq; aqua benedicta, accedat ad ægrotum, interim dicens Psalmos pœnitētiales vel alias preces pro infirmo. Cum verò ad locū venerit, paratis omnibus, accensa candelâ Sacramentum ex libro rituali conferat.

Commendationi item Animæ Agonizantium libentèr assistant Presbyteri vocati, ipsosq; in huiusmodi ultimo vitæ conflictu constitutos, oratione adiuuent, & corroborent, iuxta præscriptum Polanci de modo iuuandi morientes, & Ianussouii de arte moriendi.

Cum autem Regula & Regulæ Constitutiones seriò prohibeant, ne Fratres paupertatem Professi, etiam doni vel Eleæmosinæ nomine, in scio superiore quicquam recipiant, ideò veteri consuetudini inhærentes, statuimus, vt oblationes & Eleæmolynas quæ dantur pro celebratione Missarum, vel pro Administratione Sacramentorum nemo audeat pro se vsurpare, sub pœna Sacrilegii, sed statim illas referat ad Sacristam, qui in Registrum ad hoc paratum illas adnotet, & in carbonam communem deponat, quam singulis Quartualibus in præsentia Patris Custodis aperiet, & pecuniam inde prouenientem inter Fratres ex æquo diuidet. Verum vt vitium Proprietatis quod Paupertati Religiosæ maximè repugnat, faciliùs à Fratribus in Monasterio degentibus euitari possit, decernimus vt in posteram pecuniam, tam ex communi carbona, quàm aliunde prouenientem, omnes in vnum promptuarium pro numero Fratrum, Cistulis serratis distinctum deponant, à quo clavis sit penes Custodem, à singulis autem Cistulis penes Fratres prout eos concernēt, ita vt securi quidē sint de deposito, eo tamen, in scio Præposito vel Custode, pro sua voluntate uti non possint.

Vt autem faciliùs Fratres nostri percipere, ac cōcoquere possint, quantò in periculo salutis æternæq; damnationis, omnes ii versentur Religiosi, qui (& quidem sine vllò prorsus conscientia scrupulo) ita

lo) ita detestandæ ac perniciosæ inhiant proprietati, ac si nullum vnquam S. Paupertatis solemne votū emisissent, & ne hoc malum vterius serpat; hæc puncta ad euitandam proprietatis labem, tam ex SS. Canonibus, quàm etiam Oecumenicorum conciliorum decretis, ipsaque sanctissimi P. N. D. August: Regula deprompta hic inferenda, diligentique Fratrum trutinæ, ac considerationi comitenda esse duximus.

1. PROPRIETAS IN QVOLIBET RELIGIOSO ordine, omnium dissolutionum exorbitantiarumque est primaria & Principalis causa, ex qua cum alia plurima, tum potissimum execrandum Auaritiæ vitium inter Religiosos exoritur, hinc verò postea rixæ, contentiones, contra Superiores murmurationes, imò etiam conspirationes voluntariæ ac deliberatæ, Statutorum ordinis votorumque essentialium transgressiones, aliaque infinita mala facile subsequuntur.

2. Communis vitæ ratio quo ad victum, & vestitum adeò est Religiosis necessaria, vt ea non diligenter obseruata Paupertatis votum (quòd nil proprii admittit) vix ac ne vix quidem inuiolatum esse possit. Vnde tam Prælati quàm subditi grauissimè peccât, & sunt in statu damnationis, per quos stat quòd minus omnes Religiosi vitam agant communem.

3. Religiosus Professus solennitè cuiuscunque instituti Ordinisue fuerit, simpliciter est incapax, in particulari omnis domini rerum mobilium, & immobilium temporalium, Quia per solemnem Professionem, non tantum renuntiat, omni dominio, sed etiam reddit se incapax illius Et hoc intelligendum est de quibusuis Religiosis etiam Beneficiariis, quales sunt in Religione nostra Præpositi, Plebani, qui licet habeant ius administrandi & dispensandi fructus suorum beneficiorum, non tamen habent dominium tam ipsorum beneficiorum, quàm fructuum. Vnde non possunt de

his fructibus aliter disponere, nisi ad congruam statui suo sustentationem, Ecclesiæ necessitates, aliasq; pias causas, & non in res vanas, nec ad ditandos amicos, alioquin non tātum ipsi beneficia- ti, sed & illi peccant, qui ab eis aliquid (nisi fortè per modum Ele- gmosinæ) accipiunt.

4. Peccat Religiosus mortaliter, si velit penes se aliquid reti- nere, tanquam proprium, aut eo uti, tanquam proprio, & inde- penderet à Superiore.

5. Peccat similiter, si donet aut alienet aliquid sine tacita vel expressa facultate Superioris, & talis alienatio cum sit illicita; irrita est censenda, nec ille qui donum à religioso accipit, suum facit, sed tenetur superiori religionis restituere, iuxta Bullam Clementis VIII. quæ incipit, Religiosa.

6. Si est Religiosus dispensator aut administrator aliquarum rerum, non potest eas distribuere pro suo arbitratu, sed tantum ex præcepto & mente Superioris; & si qua in re à mente Superioris recesserit, incurrit proprietatem. Nam ita dispensat, ac si esset Domi- nus, & ad alterius Dominium non pertineret.

7. Non potest mutuo aut comodatò dare, sine consensu Su- perioris, quia tātum habet vsum rei & eum precarium, vsuarius au- tem non potest alteri vsum concedere ut habetur Instit: de vfu & Habitatione. §. 1. & 2.

8. Non licet ei quicquam etiam ab externis & consanguineis accipere sine consensu Superioris, ea præsertim intentione, ut illud sibi appropriare velit.

9. Non potest etiam ad vsum sibi quicquam ex rebus com- munitatis usurpare invito Superiore.

10. Peccat Religiosus si quidquam abscondat, illudq; sub- ducat libera Superioris dispositioni, hoc enim furtum, & Sacrile- gium est.

11. Tenetur

11. Tenetur Religiosus in iis quibus utitur conseruandis eam præstare diligentiam, quam adhibere tenetur is, qui re aliena utitur.

12. Res superfluas non potest habere etiam cum licentia superioris, potestque hac in parte peccare mortaliter, si habeat aliqua quæ statum suum non deceant.

Hactenus de Proprio.

DE CONCIONATORE.

QVoniam vero in Prædicatione Verbi Diuini, maxima & precipua pars curæ animarum consistit. Ideo dabit operam Pater Custos, vt antequam ad munus Concionatoris aliquem ex Fratribus deputatum pro approbatione ad officium remittet. Primò vitam & doctrinam eius exploratam habeat, diligenterque provideat, vt talis designetur, quem pietas, vitæ honestas, & doctrinæ puritas, commendet & cuius doctrina cum vita consentiat. quiq; in priuatis Refectorii Concionibus (in quibus se Fratres in posterum diebus præsertim festis exercere debebunt,) doctrinæ, ingenii, & facundiæ, specimen sæpius exhibuerit.

Maiores autem Commoditatis causa, tempore Hyemali Hypocaustum habebit, & ab horis decantandis liber erit. Cum autem antiqua consuetudo sit, vt pomeridianæ Conciones, singulis diebus Dominicis & Festis principalioribus à Fratribus, à Patre Custode assignatis habeantur, id in posterum obseruari debebit, vbi vel maxime populus in rudimētis fidei, doctrinæq; Christiana, iuxta præscriptum Catechismi Romani, informandus erit.

In Concionibus autem faciendis, eam Methodum seruabunt, quæ in Statutis Synodorum Prouincialium, & Diocesiarum, tum & in Epistola Pastoralis, Illustrissimi olim Cardinalis Maciejouii descripta habetur.

DE OFFICIO PROVINCIALIUM.

Prouinciales, qui vt officio ita etiam vitæ & morum integritate Regulari; obseruantia aliis præstare debent, ita se gerât, prout illorum officium in Cõstit: 8. Lib. 3. Cap: Gen: 2. descriptum exigit: præcipuè verò hæc duo puncta, perquàm studiosissimè exequétur. Imprimis Ecclesias ditioni suæ subiectas, omnes quidem semel in Anno tempore in Capit: Generali 2. lib. 3. Constit: 16. præscripto. Singulas autem emergente aliquo Casu, quoties necessitas postulauerit, per se visitent, diligentemque de vita & conuersatione Fratrum ad suam Prouinciam pertinentium, inquisitionem facere non negligent. Excessus si quos fortè aduerterint, leuiiores quidem (iuxta Constit: præscriptum) ipsimet puniant, grauiores autem ad nos deferant. Alterum verò est, vt saltim singulis Anni, quatuor temporibus, ad Reuerendissimum Generalem litteras mittant, quibus eum de rebus omnibus suæ Prouinciæ, cõmune faciant, & consilium de rebus arduis & difficilioribus exquirant.

Omnes autem Fratres extra Conuentum manentes, illis in omnibus rebus ad officium ipsorum spectantibus, non aliter quàm nobis ipsis obedire, & debitum honorem, & reuerentiam exhibere debent.

Quoniam autem de Electione, & de numero Prouincialium, in Constit: Ordinis nostri, nil expressum habemus, ideò statuimus, vt in posterum, non nisi à Capitulo Generali quatuor deligantur, & quidem tales qui huic muneri pro dignitate Ordinis nostri, & utilitate Ecclesiarum illis subiectarum, respondere possint. Si tamen aliquem ante tẽpus Capituli Generalis, è viuus decedere contigerit,

tigerit, liberum erit Præposito Generali, alium in locum demortui surrogare, à futuro Capitulo, si idoneus fuerit, approbādum.

Debent autem esse numero quatuor, videlicet maioris Poloniæ, cui Ecclesiæ Gnesnen : Sempelboriensis, Pysdrentis, Siradiensis, & Grodziscensis. Minoris Poloniæ, cui Ecclesiæ S. Hedugis in Stradom, Wrocimouiensis, Vneiouiensis, Wrociriensis, Chelmenfis, Zarnouecensis, Chodouiensis, In minori Polonia. Bythomiens : Charzomenfis : In Silesia, Landecensis, Lapsensis, & Ianusouiensis. in Vngaria, Rusfiæ, cui Ecclesiæ, Præuorscensis, Lesaiscensis, Gniwcynensis, Giedlarouiensis, Vrzeniensis, Rudolouiensis, & Tulliglouiensis. Masouiæ, cui Ecclesiæ Vissegradiensis, Rembouiensis, Scarisouiensis, Gorznenfis, Rypinensis, & Legonicensis. vnà cum suo clero perpetuò subiectæ esse debent.

DE OFFICIO PRÆPOSITORVM ET PAROCHORVM

In Beneficiis Ordini annexis manentium.

CUm alia sit ratio Beneficiorum Sæcularium, alia verò Regularium, & aliis seculares, aliis verò ii, qui per emissionem votorum solemnium arctiorem viuendi statum amplexi sunt, legibus teneantur. Proindè ne Fratres Ordinis nostri, qui ad beneficia ordinis obtinenda Capitularitèr à nobis deputantur; eo ipso quod extra claustrum degant, maiorem sibi licentiosè viuendi occasionem oblatam esse arbitrentur; Præter ea, quæ in Constitutionibus Ordinis præsertim verò Constit. 10. lib. 3. Cap. Gen : Secundo de

F

Proposi-

Propositorum & Plebanorum officio, sancita sunt, hæc puncta addenda, vel potius ex iisdem Constitutionibus deprompta, in meliorem methodum redigenda, diligentiq; Præpositorum & Plebanorum Ordinis nostri, nostræ iurisdictioni subiectorū, executioni demandanda esse duximus. Imprimis omnes, tam Præpositi, quàm Plebani Religiosæ vocationi suæ semper sint memores, & ad præscriptum Regulæ & Constit: Ordinis, quàm maxime vitam suam & mores accomodare studeant, eamq; iuxta obligationem nostri instituti, adminus semel in Septimana ad mensam prælegant. Et quia (vt potè extra claustrum manentes) in maiori periculo frequentiori; occasione peccandi versantur. idcirco eo maiora pietatis aliarumq; virtutum præsidia, sibi comparare studebunt, dabuntq; omnem operam, vt vel ex ipsa conuersatione, facile à quolibet veri Religiosi dignoscantur.

Inter alià vota essentialia, vel maximè Paupertatem, quæ totius Regularis disciplinæ firmissima, basis, ac fundamentum est semper præ oculis habeant, & secundum doctrinam hac de re superius traditam se gerant, neq; bonorum, aliorumq; fidei suæ commissorum prouentuum Dominos, sed potius temperaneos dispensatores & administratores se esse sciant; ac proinde in iis dispensandis, non quod propriæ lubet voluntati, sed quod Regulæ ac Constitutionibus, sacrisq; Canonibus cõformè ac consentaneum est faciendum esse meminerint, eaq; præstent, quæ fidelem dispensatorem decent. Quod vt eo facilius exequi possint, volumus vt Præpositi, Plebani, & quicunq; beneficia Ordinis nostri, cuiusvis conditionis obtinent, ita redditus & prouentus suos distribuunt, vt quotidie si opus fuerit, ad rationes reddendas, parati esse possint. Ac præterea vt omnium reddituum ac expensarum, fideliter ac diligenter cõscripta habeant Regestra, illaq; quotannis semel idq; immediatè circa Festum Diuisionis Apostolorum, vel alio huic proximo opportu-
niori.

hiori tempore, siue per se, (si ita commodè fieri poterit) siue per suum Vicarium, aliamque idoneam personam ad nos Miechouiam: in absentia verò ad Custodem pro tempore existentem transmitti curent. Ne autem aliquid de bonis aliisque Prouentibus Ecclesiarum, siue per incuriam beneficiatorum, siue per alium quèpiam modum depercat, ordinata Inuentaria tam sacræ rei Ecclesiasticæ, quàm etiam supellectilis Domesticæ habeant, & ea fideliter & ordinate descripta singulis trienniis ad Monasteriũ trāsmittant.

Volumus præterea, vt singuli Beneficiati, in posterum habeant librum, in quo omnia Priuilegia, ad suam Ecclesiam spectantia, de suis originalibus describant: ipsa autem Originalia Priuilegia nullatenus penes se retineant, sed ea quamprimũ ad Archiuium remittant Conuentus, in quo etiam libro specialiter annotare debent omnes prouentus & redditus beneficiorum suorum, tam eos quorum sunt in vsu, quam eos, qui vel negligentia antecessorum suorum, vel iniquitate temporum deperierunt.

De bonis ad Ecclesiam suam pertinentibus (quoties necesse fuerit) iure agant, in iisque defendendis, ac recuperandis (si quæ fortè per negligentiam Antecessorum suorum alienata fuerint) sumptui non parcant. De omnibus verò Reuerendissimum certiore faciant, nequè ipso incio, de controuersiis, maioris præsertim momenti, priuata autoritate transigere, & multominus per mutationes donationes, vel (quod absit) venditiones, aut alienationes bonorum, ad suas Ecclesias spectantium, facere præsumant, sub pœnis à SS. Canonibus statutis, & aliis à Reuerendissimo irrogandis.

Circa administrationem Sacramentorum (qui curam animarũ habent) ita se gerant, prout liber Agendorum, Epistola ad Parochos, & Constitutiones Ordinis, per integrum librum primum, Cap. Gen. 2. hac de re sancitæ præscribunt, ac præterea lectioni Casuum conscientie diligenter incumbant, nec quicquam pro ad-

ministracione Sacramentorum exigant, præterquam si quid spontè per modum Eleemosinæ illis offertur.

Cum autem sancta sanctè tractanda sint, puritati conscientia, vel maximè studeant; Examen Conscientia, antequam conferant se cubitum, quotidie faciant, & mane orationi mentali, seu meditationi, ad minus per vnum quadrantem vacent: neque peccatorum Confessionem in longum differant tempus, sed ad minus semel in Septimana, (nisi sæpius Conscientia testimonium requirat,) iuxta præscriptum Constitutionum siue fratri, siue alteri cuiuspiam Præsbitero, approbato tamen, ritè Confiteantur, si autem in aliquem casum reservatum inciderint, ad Prouincialem pro absolutione recurrant. Quod si aliquis commoditate Confitendi destitutus, aliquo peccati scrupulo angatur; non audeat ad Diuina Officia, præsertim verò Sacrosanctum Missæ Sacrificium, nisi prius feruentem contritionis actum, cum proposito quamprimum confitendi elicerit; accedere.

Ante accessum autem ad altare (quod ad minus ter in Septimana, præter dies Festos, ex præscripto Constit: frequentare debent) diligenti præparationi, ad minus per vnum quadrantem insistant; neque item absoluta Missa, statim ad fabulas, aliasque varias occupationes, sed potius ad orationem siue vocalem, siue mentalem se conuertant.

Cum verò id potissimum ad Officiū Pastoris spectet, vt oues suas agnoscat, & illæ vocem eius audiant, operæ precium fuerit, vt non tantummodo Vicarii (quod hætenus quibusdam in locis consuetudine inualuit) sed etiam ipsi Beneficiati, nonnunquam diebus Dominicis, & solemnioribus Festis, (præsertim si non fuerint legitimè impediti) per se ad populum verba faciant, suosque Parochianos in rudimentis fidei, vt potè Oratione Dominica, Symbolo, Decalogi, & Ecclesiæ præceptis, quam diligentissime informent,

ment, modumque ritè Confitendi ac communicandi eosdem edoceant, ad audiendum quolibet die Dominico, & Festo sacrum Missæ Officium serio adhortètur: abusus, siue ex crassa quorundam simplicitate, siue ex deprauata consuetudine, inueteratos, tollere studeant, in vitia quæ præsertim inter suos Parochianos dominari aduerterint, in Concionibus acritèr inuehantur, & quod caput est, nullum de seipsis scandali vestigium relinquunt. Præsertim verò frequentationes cauponarum; ebrietates, lusus alearum, extra proprias domus (quæ instar claustrum vbique locorum, etiam in villis esse debent) pernoctationes (nisi fuerint in itinere) omnino deuictæ, nilq; eiusmodi committere audeât, quod ipsi honestati statuique Religioso repugnet.

Ab Ecclesiis suis, diuturno præsertim tempore, sine vrgenti necessitate, non se absentent, sed domi assidue residentes, rei Oeconomicae ita attendant, vt cultus Diuinus in nulla re negligatur. Familiam Domus in honestate, & disciplina retineant; & ne quid indecens (quod Deus auertat) in domo Religiosa fiat, diligenter prouideant.

Quia verò non sine graui dolore nostro, cum ipsamet experientia, tum crebris Fratrum ad inuicem, quæ ad nos deferuntur, querimoniis edocti sumus, debitum amorem Fraternalium, difficilè reperiri inter Beneficiatos & Vicarios; tum quod illi ea quæ de victu & amictu, aliisque necessariis Fratribus Vicariis suppeditandis, in Constit. Ordinis sancita sunt, iisdem denegent, tum quod isti proprietati magis quam necessitati studentes, necessariis non contenti, superflua ab eis exigant, neque tamen quidquam de suis obventionibus superioribus suis concedere velint; Proinde, vt omnis in posterum hisce altercationibus ac querimoniis aditus percludatur, statuimus ac seriò præcipimus. Inprimis vt Præpositi & Plebani debito amore Fraternali, (quem vitæ & morum statusque similitudo

facile conciliare potest, & debet) Vicarios suos prosequantur : & quemadmodum omnium laborum, qui in Spirituali administratione Ecclesiæ suscipiuntur ; sunt participes & socii ; ita victu & rebus aliis dissimiles esse non debent, sed vt communi illaque decenti mensa vtantur, necesse est. Non solum autem victum sed amictū quoque, aliaue necessaria, quæ in Conuentu Fratribus suppeditantur, (iuxta Constit: X. Cap. Gen. 2. lib. 3.) Beneficiati Vicariis suis, in posterum tenebuntur providere, hoc pacto, vt quid Vicarii siue ex Eleemosinis siue (vt vocant) petitionibus, siue ex aliis quibuscunque piis Benefactorum collationibus, (quas tamen insciis Superioribus accipere nunquam illis fas erit) acquisierint, id totum in Carbonam, cum scitu eorundem superiorum suorum, quorum sunt Vicarii reponant. Illi vero nulla quidē Quartualia (quod hactenus non sine graui paupertatis iactura, passim obseruatum est) Vicariis suis ad manus tradant, sed eadem similiter in Carbonam communem, iuxta quantitatem hactenus obseruatam (in Gnesnensi autem Præpositura, vbi nullæ ferè sunt Vicariorum obuentiones in duplo augentes) deponant : atque ex tota hac pecunia, ex Carbona sumpta, vel ipsi necessaria prouideant, vel ab ipsis Vicariis cum scitu suo, eadem comparari permittant. Quod statutum ita penitus volumus obseruari, vt si in aliorum, certe in huius transgressores, serio nos animaduerturos polliceamur.

Ceterum cum & variis summorum Pontificum decretis, sub grauissimis Ecclesiasticis censuris prohibitū, & ipsis Ordinis nostri statutis quā diligentissimè cautum sit, ne vllus ad omnium Regularium cuiuscunque instituti, Ordinisque domos & loca, mulieribus aditus pateat ; Nos verò eiusmodi pleraque habeamus Beneficia, quæ ad rem Oeconomicam cum fructu administrandam, ministerio mulierum saltem ætatis prouectioris indigeant, idque in Constit. 2. lib. 3. Cap. Generali 2. concedatur ; talis moderatio
hac in

hac in parte videtur adhibenda, vt nimirum beneficiati nostri, ad euitandam cum mulieribus conuersationem; præter commune hypocaustum, separatas aliquas habeant mansiunculas, ad quas nulli omninò fæminæ (siue illa domestica siue externa fuerit) accessus pateat. Cæterum Constit. 2. lib. 3. cap. Gen. 2. de Habitatione Religiosorum in omnibus punctis satis fieri volumus.

Cum leuioribus leuiora, grauioribus autem atque adeò periculosioribus vulneribus efficaciora medicamenta sint adhibenda, ne dum graues morbi minus efficacibus curantur pharmacis, eo grauius inualescunt neq; in posterum aliis quibuluis etiam efficacissimis iisdem mederi possit. Proindè etsi hætenus ea de re, vix aliquid expresse in Constit: Ordinis habeatur, tamen cum ad nos nostramque pertineat conscientiam, de meliori Fratrum curæ nostræ cõmissorum statu semper providere, auctoritate nostra, qua in hoc Ordine, Diuina disponente, voluntate fungimur: Statuimus vt si qui (quod Deus auertat) Ordinis nostri Beneficiati Religiosæ vocationis suæ, votorumque essentialium obliti, crimine incontinentiæ fuerint notati, pessimumque exemplum aliis, maximè autem Parochianis de seipsis præbuerint, post Præmissam vnam atq; alteram à Reuerendissimo admonitionem, & correctionem, nullo tamen emendationis effectu subsequente, tales in posterum, si ex inquisitione, rei huius abominandæ turpitudinis reperti fuerint, siue vllò iuris strepitu ipsis beneficiis priuentur, & in Conuentum reuocati in ordinem aliorum Fratrum redigantur: acturi isthic poenitentiam quæ illis assignata fuerit.

Non solum autem sui, sed etiam Fratrum Vicariorum diligentem debent habere curam: ipsiſque (quod superiorum proprium est) ad omnem virtutem sint exemplo & incitamento. Quocirca ipsorum domos sæpius visitent, singulisque Quartualibus, rationem de Eleemosinis, aliisque ipsorum obuentionibus diligenter exigant.

exigant, neque sine scitu suo ab illis, vel minimum quid piam comparari permittant. Infirmis debitam charitatem exhibeant. Horas Canonicas simul recitent; frequentes de rebus ad salutem vitamq; religiosè instituendam pertinentibus, inter se colloctiones habeant, neque tempus ab aliis curis vacuum incassum abire patiantur.

Quod si verò aliquis Vicariorum, à verò virtutis ac Regulæ tramite deflexerit, eum continuò suus admoneat Superior, ne fortè silentium sit causa vltioris mali: Si verò idem Vicarius admonitionē Superioris sui cōtemplerit, iterumq; in aliquo defectu vel excessu notatus fuerit, nos qui omnium curam gerimus. Præpositis & Plebanis damus facultatem, tales Fratres tanquam inobedientes puniendi, siue Carcere, siue Cilicio, siue priuatione mensæ, imò suspensione à Diuinis, iuxta quantitatem delicti. Quòd si neque ista curauerint, ad Prouinciales eos deferant: ingrauescente autem ipsorum insolentia, ad nos Miechouiam pro grauiori correctione, præscripto ipsorum excessu, pedester remittant.

Quoties verò tam ipsos Beneficiatos, quàm alios Fratres ad Cōuentum alicuius negotii causa venire contigerit, statim intra Scripta Monasterii se conferant, neque in ciuitate pernoctare, & multòminus comestationibus & compotationibus, ibidem indulgere præsumant: Quod si suam liberalitatem Fratribus in Conuentu residentibus in exhibendo præsertim, aliquo vini poculo, declarare voluerint, id in Conuentu pro vsu communis mensæ (moderate tamen) facere poterunt. Nobis autem curæ erit, pro Paterno erga omnes amore, vt quamprimum commoda aliqua habitatio pro Fratribus Hospitibus, excipiendis præparetur, & omni necessaria supellectili instruat.

Quandoquidem autem Prouincialia Statuta, aliæque Ecclesiasticæ ordinationes id prohibent, ne Religiosi Regularia, & quouis alia beneficia obtinentes, solitarii ac sine socio (qui ipsorum
Religi.

Religiøsæ cōuerſationis teſtis eſſe debeat) extra clauſtrum viuere præſumant; id autem apud nos (vbi in quibuſdam locis, ob tenues Prouentus non niſi vnus Frater degit) minimè obſeruetur. Proindè & ſi non facile, ſanè hac in parte modum reperire eſt, quo & Eccleſiaſticis Decretis, & conſcientiæ Fratrum conſuli poſſit, vehementèr tamen optaremus, vt vbicunq; reditus Eccleſiæ ferunt expenſas ad alendum Vicarium, is deinceps Præpoſito ſeu Parocho adiungatur, qui ſit morum & Conuerſationis illius veluti teſtis, vbi autem adedò exigui ſunt Prouentus, vt nequaquam pro duobus Fratribus alendis ſufficiant, neque aliqua ratione, præſertim verò recuperatione amiſſorū & alienatorum augeri poſſit. Talia Beneficia potiùs in manus Ordinariorum tardātu: quàm cōtra Canonum præſcriptum & Regulæ inſtitutum retineantur.

Non poſſumus non multum laudare R. P. Felicem Scarifeuienſem Præpoſitum Leſaiſcenſem, qui ſingulari ſua prudentia & induſtria, non modo Prouentus Eccleſiæ ſuæ notabiliter auxit, verum etiam manſionariam in eadem Eccleſia erexit quam nos ratam & gratam habentes, libenter approbamus & confirmamus. Tertiumque Vicarium è Conuentu, ad eandem Eccleſiam perpetuò aſſignamus.

DE OFFICIO VICARIORVM.

Vicarii, quando è Conuentu Generali Miechouienſi, ad aliquod Particulare Ordinis noſtri Beneficium, ſubſidij cauſa, circa curam animarum mittuntur, cogitent imprimis, iſdem planè Religionis votis, Ordiniſque Conſtit: vbicunq; locorum fuerint ſe teneri. Quare omnes hortamur ac præcipimus, vt ad præſcriptum Regulæ & Conſtitut: Ordinis, vitam ſuam accomodare

G ſtudeant,

studeant, eamque ad minus semel in Septimana ad mensam prælegendam attentè audiant, & memoriter addiscant.

Officia Diuina iuxta loci consuetudinem, debitis & statutis horis deuotè ac summa cum attentione (nominatim verò Fratres, circa Ecclesiam Præuorscensem residentes, præter Officiū Beatissimæ Mariæ Virginis, Primam maiorem singulis diebus Dominicis & Festis) decantent, Sacramenta Parochianis tempestiue, decenterque ad præscriptum Agendorum, & Constitutionum Ordinis administrent, nec quicquam ab eorum administratione (præterquam si quid per modum Eleemosinæ spontè offertur) exigat; Eisdem Parochianos in fide & doctrina Christiana, in Concionibus præsertim, prout de Parochis superius dictum est, diligentèr instruant, illa verò quæ ad Credendū vnicuique etiam simplicissimo (si salutem consequi vult) omninò sūt necessaria. Septem Sacramēta, vt potè Mysteriū Sanctissimæ Trinitatis & Incarnationis, pro capto auditorum frequenter explanent; Peccata grauiora præsertim, seuerè increpent, fidelesque ac strenuos in animarum salute procuranda Prælatorum suorum Cooperarios se præstent.

Confessionem (iuxta præscriptum Constitutionum) ad minus semel in Septimana, vel sæpius quando id necessitas exigit, vel sibi ad inuicem (si fuerint plures) vel superiori suo, vel cuiuspiam alteri cū scitu ipsius faciant. Aliorum verò Confessiones non audeant excipere, nisi prius ab Officio Locordinarii fuerint approbati; Quam approbationem vt eò facilius consequi possint, tempus (cuius magnam habent copiam) Sacræ lectioni & casuum conscientie studio impendant.

Superioribus suis, penes quos interim manent, debitam exhibeant reuerentiam, admonitionesque ipsorum, non aliter ac nostras accipiant, ipsique in omnibus (præsertim licitis & honestis) obtemperent, verbis & actibus morosis (quod Deus auertat) nisdem
nullo

nullo prorsus modo sint molesti, neque eorum familias perturbare, reique Oeconomicae (nisi ipsimet rogantibus) sese miscere audeant. Silentium seruent, debito praesertim tempore videlicet absolutis refectio- & recreationum (quae tamen in longum tempus pertrahi non debent) horis.

Hora certa cubitum se conferant, atque surgant, quae per suos Superiores, pro temporis qualitate assignanda erit. Examen Conscientiae vespertino tempore, singulis diebus faciant; Mane verò meditationi, ad minus vnum quadrantem impendant. Ac denique ante & post Missae celebrationem (quam praeter dies Festos, ad minus ter in Septimana, iuxta praescriptum Constit. absolueri obligantur) ita se gerant, prout superius de Beneficiatis & in Capit. Generali secundo, Lib. 2. Constit. 1. est praescriptum.

In suis habitaculis semper se contineant, neque sine licentia Superiorum suorum (quae absque legitima causa eis facile concedi non debet) extra septa domus Parochialis egredi audeant, multo verò minus Tabernas, aliaque loca Religiosis minus competentia adire, ibique (quod absit) computationibus, Choreis, alearum lusibus, aliisque inhonestis actibus, vacare praesumant. Quod si aliquis secus fecerit, liberum erit Superiori, tam insolenti Fratri poenam incarcerationis, cilicii, Ieiunii & disciplinae, (prout superius dictum est) assignare, vel etiam si proteruus fuerit, eum à Divinis ad tempus suspendere.

Inter alia autem, id vel maximè omnibus Vicariis seriò precipimus, ut omnes à colloquiis & conversatione mulierum abstineant, neque cum illis (nisi specialis consensus Superioris, causaque legitima accellerit) colloquia habere audeant, multo verò minus eadem in sua habitacula ingredi patiatur; Si quidem id graui simè Statutis ordinis & SS. Canonibus, ac recetioribus Bullis Pontificiis vetatur, & transgressores censuris Ecclesiasticis subiiciuntur.

Ne verò aliqua proprietatis suspitione, Fratres nostri Professi laborare videantur; Mandamus in virtute sanctæ obedientiæ, vt in posterum omnes Vicarii, nil sine scitu suorum Prælatorum, penes quos interim manent, siue per modum doni vel Eleemosinæ, aut alio quocunque nomine ab vilo quopiam accipere, de illoque pro suo libitu disponere audeant, sed omnes & singulas obuentiones & Eleemosinas, nec non quartualia, à Beneficiatis pendi solita, in communem carbonam ad id præparatam conferant, à qua vna clauis penes Beneficiatum, altera penes Vicarios remaneat; Competenti verò tempore, quando id necessitas postulauerit, totam illam pecuniam, cura & industria Vicariorum acquisitam, Beneficiati non nisi in eorundem necessaria expendent, vel certè eandem inter illos distribuent, ita tamen vt nihil de pecunia accepta, Vicarii sine scitu Superiorum, in necessitates suas exponant, & quoties ab eis requisiti fuerint, sint de omnibus reddere rationem parati.

Quamuis autem vel maximè propriam quisque conscientiam attendere debeat, neque in alterius facta curiosius inquirere. Fraterna tamen charitas exigit. vt mutua à Fratribus extra manentibus, ad inuicem de alterius salute cura habeatur; Proinde Vicarios omnes in Domino hortamur, & omnes in conscientia obligamus, vt non tantum propria, sed etiam Superiorum suorum (quorum honestæ vitæ, & cōuersationis Religiosæ testes esse debent) conscientiæ rationem teneant, & si quid (quod absit) scandalosum in eis aduerterint, id ad nos in posterum fideliter, siuè scripto, siuè quocunq; alio modo deferre teneatur, omni tamen malo affectu odii, inuidiæ, aut vindiictæ excluso.

Denique cum in Capitulo Generali r. prudentè sancitum habeatur, vt Vicarii triennio exacto, ad Conuentum reuocentur, ne videlicet extra Claustrum manentes, in obliuionem Regularis
disciplinæ

disciplinæ, quæ maxime in Communitate vigere debet veniant, eandem ordinationem in posterum diligētius, quàm hactenus obseruandam, & eos Fratres qui vltra triennium extra manent, in Conuentum reuocandos esse declaramus.

DE EXECVTIONE
P V N C T O R V M,
Ex præcedenti Visitatione relictorum.

Quia verò nonnulli tam ex Beneficiatis quàm ex Vicariis, circa inquisitionem per Iudices Cōmissarios, ad id specialiter deputatos reperi sunt, qui punctis sibi ex Visitatione Anno præcedenti per nos facta, ad exequendum relictis, vel non omnino satisfecerunt, vel penitus ea exequi neglexerunt: idcirco ne iam se prorsus liberos ac immunes, ab eorundem executione existiment, seriò mandamus ac præcipimus, vt ea omnia & singula infra spatium vnius Anni, à celebratione huius Capituli computandi adimpleant, & exequatur; ac præterea illi qui Regestra prouentuum, ac suppellectilis tam Ecclesiasticæ, quàm Domesticæ, secum pro Capitulo præsentì non attulerunt, vt eadem infra Semestre in Conuentum Miechouiensem transmittant, idque sub pœna priuationis beneficiorum, vel sub aliis, arbitrio nostro, irrogandis.

DE TEMPORE
O B L I G A T I O N I S,
Cōstitutionū, in præsentì Capitulo sancitarum.

VT autem ea omnia & singula Statuta, quæ in hoc Generali Capitulo diuina inspirante gratia, Communi totius Ordinis nostri accedentes consensu sancita ac decreta sunt, debitæ mādentur executioni; nullaquē in posterum obligationis incertitudo à quopiam ex Fratribus prætendi possit. Statuimus & decernimus, vt postquam præsentēs Constitutiones, siue scriptæ, siue Typis expressæ, ad manus in Conuentum quidem Custodis, extra verò Prouincialium Ordinis nostri deuenerint, ipsiq; eas, Custos nimirum in Conuentu, Prouinciales verò in suis Prouinciis publicauerint, & ad notitiam omnium Fratrum deduxerint, ab ipsa publicatione infra duos menses incipiant obligare, ita vt si quis posthac temerariè eis contrauenire, vel eas aliter quàm par est, & personant, pro suo libitu interpretari, ac proinde illorum executionem negligere ausus fuerit, pænas tam in iisdem Constitutionibus expressas, quàm etiam à nobis pro quantitate delicti imponendas, irremissibiliter sit luiturus.

HORARVM DISTRIBUTIO
AD DIVINA OFFICIA,
Et alia Regularia Munia in Conuentu Miccho-
uiensi ordinatè peragenda.

A Reuerendissimo Dño Generali conscripta, & inter alia Reformationis Puncta, ex visitatione Patri Custodi pro executione demandata.

M A T V T I N V M.

us IV

CO

H ora

Hora solita videlicet circa mediam noctem post pullum Campanæ, qui ad minus vno quadrante præcedere debet, Fratres conueniāt in Refectorium, vt inde in habitu decenti & zonis præcincti, omnes simul ad Chorum egrediantur. Diebus solemnioribus præsertim primæ Classis exceptis, quibus in posterum horæ Matutinæ, circa tertiam post mediam noctem, in Choro inferiori, ianuis Ecclesiæ apertis, solennitè decantari debebunt, quatenus illis populus, deuotionis causâ, commodius interesse possit.

Postquam in Ecclesiam conuenerant, facta ibidem Venerabili Sacramento debita reuerentia, dicta item flexis in terra genibus, Oratione Dominica, & Salutatione Angelica, à Patre Custode, vel si ipse absens fuerit, à Vicecustode signum inchoationis expectent, quo dato consurgant omnes, ad inchoationem officii, & sistant vsq; ad finem Gloria Patri &c.

In decantando Matutino officio, aliisque diurnis horis, Pater Custos omnem curam adhibeat, vt sit cantus grauis, lentus, & intelligibilis, qui si aliqua præcipitatione vel concitata pronuntiatione præpeditus fuerit, manus pulsu in grauitate retineatur.

Intra Diuinum Officiū, nemo ex Choro seu Oratorio exire audeat, nisi legitima causa (venia tamen prius à Custode, vel in absentia ipsius à Vicecustode accepta) euocatus fuerit, sub pœna per Patrem Custodem assignanda.

Absolutis horis, cum exeundum erit, non nisi prius signo dato, simul omnes ex Oratorio egrediantur. Inde in Cellas, vel frigidibus ingruentibus, in commune hypocaustum sese recipiant; Nullusq; audeat ineptis & vanis colloquiis, alios orationi vel lectioni vacantes impedire, vel silentium frangere; quòd deinceps, exceptis recreationis horis, semper in Refectorio & Dormitorio exactissimè seruari debet. Quòd si quis contrarium fecerit, eum Vicecustos officii admoneat, cuius monitioni si non obtemperauerit, ad

rit, ad Patrem Custodem deferatur, in q̄nem ille grauius aduerte-
re debet. Si quis verò, nisi vera infirmitate impeditus, (de qua
Patri Custodi certò constare debet) Matutinum officium inter-
miserit, is cum vno ex Fratribus Professis à Patre Custode depu-
tato, illud absoluat; pro negligentia autem priuatione vnius fer-
culi, irremissibiliter puniatur: hoc adiecto quod ingrauescente ali-
cuius negligentia, p̄na quoque debet ingrauescere, iuxta mo-
dum in Punctis Reformationis à nobis præscriptam.

Si quis autem initio Matutini non adfuerit, vel aliquid ex horis
diurnis neglexerit, is pro hac negligentia quinque Orationes Do-
minicas tempore prandii flexis in terra genibus recitabit.

H O R A P R I M A & T E R T I A.

Primam pulsus præcedat media hora, vt vno quadrante se ve-
stiant, & altero meditationibus, & aliis piis orationibus ad e-
xercitium matutinum spectantibus vacent. His completis signum
detur ad inchoationem Primæ temporibus quidem æstiuo & Ad-
uentus hora 6. Hyemali verò hora 7. Dum autem Prima in Hye-
me decantatur lectum Sacrum, in æstate autem, circa ortum so-
lis, propter homines occupatos, celebretur.

Post Primam immediatè Maturum Sacrum cantatum subsequa-
tur, quo inchoato lectum quoque Sacrum in superiori Oratorio
per Presbyterum à Patre Custode assignatum inchoari debet,
quod integrum omnes Fratres, præsertim qui eo die non sunt ce-
lebraturi, sub p̄na arbitrio superiori irroganda, deuotè & atten-
tè audire à modo teneantur.

Post Maturum Sacrum Tertia immediatè, præsertim diebus
professis succedat; Hac absoluta, quicquid supererit temporis
infra Tertiam & Sextam, id totum impendent, Iuniores quidem
lectioni quæ prælegetur audiedis & aliis Scholasticis exercitiis;

Præby-

Presbyteri autem lectioni casuum Conscientiæ, & Sacræ scripturæ; nec quisquam vanis colloquiis vel minùs necessariis deambulationibus, alios impediatur. Et si quis talis repertus fuerit, in eum Pater Custos aduertat. Si quis verò cōpotationibus cremati, vel aliis minus honestis occupationibus indulserit, talis grauiori pœna mulctari debet.

SVMVM SACRVM, & SEXTA.

Svmum Sacrum diebus Festis statim post Tertiam subsequi debet, aliis vero diebus Æstiuo tempore hora 9. Hyemali verò hora 10. per scholares decantetur. Post Summum Sacrum in Festis duplicibus & semiduplicibus, reliquis vero temporibus ante (iuxta ordinationem in Rubricis Missalis Romani præscriptam) Sextam Fratres cantabunt. Finita vero Sexta, vel Summo Sacro (post quod diebus solennioribus Sacrum lectum propter hospites haberi debet) omnes Fratres sub priuatione nobilioris feruli ad benedictionem mensæ tempestiuè cōueniant, quæ absoluetur ab Hebdomadario cum graui & distincta pronuntiatione.

P R A N D I V M.

Intra Prandium modestia & silentiū iuxta Constitutiones Ordinis seruentur, & lectio Sacra instituatur, ac vnus ex Presbyteris secundum Ordinem cum vno, vel si necesse fuerit, etiam cum altero ex Iunioribus mensæ inseruiat. Quæ ultra tres quadrantes tam in prandio, quàm in cœna protrahi non debet.

N O N A.

Prandio finito post Gratiarum actiones, ad decantandam Nonam (nisi ex præscripto Rubricarum ante Prandium esset absoluenda) in Chorum se conferant, & eundo Psalmum Misere-

H

re decen-

re decenter & deuotè recitent. Nona absoluta horam vnā recreationi impēdent: hac finita lectioni & scripturæ sacræ aliisque actibus Religiosam vitam concernentibus, operam dabunt ad Vesperas vsque; Vicecustode tanquam morum Magistro id attendente, & negligentes Patri Custodi deferente.

VESPERÆ.

Pro Vespertinis precibus pulsabitur tempore Æstiuo hora 3. tempore verò Hyemali hora media post secundam, quæ per scholares cantabuntur, pro quibus etiam abfoluendis omnes Fratres in Oratorium semper conueniant. In Vigiliis autem & diebus solennioribus omnes ad Chorum inferius in Ecclesiam tempestiuè descendant, nec illos Custos in Choro expectet; qui autem tarde venerit, is vno poculo ceruisiæ priuetur.

Similiter etiam quicumque ex Fratribus diebus Festis Missæ solennis in Choro non interfuerit, vel Concionem audire neglexerit, priuatione duorum seculorum puniatur. Postquam verò in Chorum venerint, & locum proprium in Stallo occupauerint, statim cum ea qua par est deuotione, orationibus incumbant, & à mutuis colloquiis, ac non necessariis deambulationibus abstinébunt. Post Vesperas autem habebunt recreationis mediam horam, deinde lectioni & aliis Religiosis exercitiis ad Completorium vacabunt.

COMPLETORIUM & CENA.

Completorium dato per Patrem Custodem siue per Vicecustodem signo, tempore quidem Æstiuo hora 5. Hyemali verò media post quartam Fratres omnes cantabunt in Oratorio; quo finito Cena seu refectio succedat; in qua Silentium, Lectio Sacra, & alia omnia quæ de prandio præscripta sunt seruentur.

HORA

HORA RECREATIONIS, Et dormitum se conferendi.

POST Cenam habeant vnam horam in Refectorio, vel Dormitorio modestæ deambulationis ob digestionem, vel etiam honestæ ad inuicem colloquutionis. Qua finita & signo per Patrem Custodem dato, omnes statim ad Chorum conueniant, & Litanias in Officio Patronorum specificatas deuotè decantent, ac inde recta in cubicula sese conferant, ibidemque vno quadrante examini Conscientiæ & Orationibus ex Thesauro Precum, vel alijs pijs libellis ad id accommodatis vacabunt, altero autem vestes deponent, & cubitum se conferent; nec amplius deambulationibus, & multominus comotationibus, tam in Refectorio quàm in Cellis indulgeant, nec vllus deinceps strepitus in Dormitorio audiatur, idque sub pœna carceris vnius diei irremissibiliter irroganda. Quicumque autem huic Ordinationi nostræ temerè contrauenierit, in eum per Patrem Custodem seuerè aduertatur. Et si quis (quod absit) fuerit incorrigibilis, ad nos pro grauiori animaduersione deferatur. In cuius rei fidem, præsentem manu propria subscripsimus, & Sigillo nostro communiri mandauimus. Dat. in

Conuentu nostro Miechouensi die 9. Nouembris.

Anno Domini, 1619.



Literæ Indictionis Capituli Generalis.

MATTHIAS LVBIENSKI, CANONICORUM Regulariū Ord. Sepulchri Dñi Hierosolymitani, Conuentus Miechouiensis PRÆPOSITVS Generalis. &c. &c.

Vniuersis & singulis Rndis ac Venerabilibus Fratribus, Præpositis, Parochis, ac cæteris Canonicis Regularibus SS. Sepulchri Domini Hierosolymitani, qui Capitulo Generali Miechouiensi interesse tenentur, Fratribus charissimis Salutem in Domino.

LAudabili vſu, ac diuturna consuetudine, in Religione nostra receptum & obseruatum fuisse, cū ex traditione Maiorū nostrorum, tū ex variis literarum munimentis ad nos transmissis intelleximus, vt singulis trienniis, visitatione Ecclesiarum Conuentui nostro Generali Miechouiensi. annexarum præmissa, Capitula Generalia indiceretur, ad quæ omnes Ordinis nostri Fratres, præsertim verò ij, quibus cura alicuius Ecclesiæ est demandata, conuenirent, & ad Regularem disciplinam re-

nam retinendam ac restaurandam in cōmuni Con-
silia sua conferrent. Quæ quidem cōsuetudo, cum
iam à multis Annis sit intermissa, non sine insigni
Religionis nostræ iactura; Nos quamprimùm di-
uina voluntate ita disponente, & vnanimi Consen-
su omnium vestrum ad id accedente, regimini (li-
cet indigni) huius Vniuersi Ordinis ante trien-
nium admoti sumus, statim de indicendo hoc Ge-
nerali Capitulo seriò cogitare cœpimus. Cùm ta-
men ad id ritè & vtiliter obeundum plurimū con-
ducere videremus, si prius statum & conditionem
omnium Ecclesiarum nostræ Iurisdictioni subie-
ctarum perspecta haberemus: ideò quamprimum
nobis per alias occupationes licuit, Anno superi-
ore vniuersum ferè Regnum eius rei causa obui-
mus, & singulas Ecclesias Ordinis nostri (ijs tan-
tum exceptis, quæ extra fines Regni, ob præsentis
ibidem motus, commodè adiri non poterant) in
persona nostra adiimus & visitauimus. Quo qui-
dem negotio utcunq; pro virium nostrarum imbe-
cillitate peractò, & iis quæ ad præsens necessaria
esse videbantur, in singulis Ecclesiis præscriptis,
& ordinatis, communicato prius cum Consiliariis
nostris Consilio, Generale Capitulum hoc Anno
Miechouiam conuocandum & indicendum, Deo

omnipotente authore esse censuimus, prout per
præsentes literas nostras, (quod utinam Religioni
nostræ feliciter cedat) conuocamus & indicimus,
die Decima nona Mensis Octobris Anni præsen-
tis inchoādum. Cui quidem Capitulo, etsi omnes
Fratres etiam extra Conuentum degentes, de iure
& consuetudine adesse obligantur, ne tamen Ec-
clesiæ illæ, quibus inseruiunt, si omnes eas defere-
rent, debitis interea officiis defraudētur, hoc mo-
deramen adhibendum esse duximus, vt vno, vel al-
tero Fratre (quod si solus tantum sit curatus, ali-
quo sæculari Presbytero) penes Ecclesiam relicto,
qui aliorum absentia suppleat, reliqui omnes, tam
Curati, quàm etiam Vicarii, pro die superius spe-
cificata Miechouiam se sistant, atque præhabita se-
cum matura deliberatione, ea parata habeant, quæ
in hoc Capitulo utiliter proponenda esse censue-
rint. Ac præterea Curati omnes, ac quilibet eorum
afferant secum suas præsentationes & Inuestituras;
Rationes suorum Prouentuum; Indices rerum su-
arum, ac Inuentaria suppellectilis Ecclesiæ: sintq;
parati sufficiēter, nos, ac vniuersum Capitulum in-
formare, de Ecclesiarum suarum statu, nec non e-
tiam de eo, quomodo Ordinationibus nostris, ex
præcedenti visitatione nostra sibi præscriptis hæte-
-oquinmo 1588 H nus sa-

nus satisfecerint. Quòd si verò aliquis eorū (quod
tamen minimè optamus) vel ob decrepitam æta-
tem, vel ob aduersam valetudinem, adesse non pos-
sit, is tamen cū sufficienti absentia suæ excusati-
one, & cū aliis requisitis, superius specificatis, Vi-
carium suum expedire, vel si illum non habuerit,
per viciniorem Fratrem ea trāsmittere, non negli-
gat. Vt autem præsentes literæ, ad eorum quorum
interest notitiam citius perueniant, volumus vt ab
eo, ad quem primo à nobis transmissæ fuerint, ad
viciniorum Ordinis nostri Ecclesiam, sine vlla mo-
ra, transmittantur. donec circulus Ecclesiarum eo
Ordine, qui in superficie huius edicti nostri, adno-
tatus est, absoluantur, & penes vltimum remaneāt:
cum attestatione singulorum Beneficiatorum no-
strorum, quando ad illos delatæ, & quando ad vi-
ciniorum Præpositum, vel Parochum, ab iis trans-
missæ fuerint. Ille autem ad quem postremò per-
uenerint, eas secum adferre, & in futuro Capitulo
exhibere teneatur. Hæc autem omnia & singula in
virtute Sanctæ obedientiæ, & sub pœnis à Cano-
nibus, contra eiusmodi negligentes constitutis, ac
aliis à nobis, pro arbitrio nostro infligendis præ-
cipimus. Ac in euidentius eius rei testimonium,
præsentes manu nostra subscriptas, Sigillo nostro

commu-

communi mandauimus. Datum in Conuentu
nostro Miechouiensi. Die tertia. Mensis
Augusti. Anno Millesimo. Sexcente-
simo. Vigesimo.





